

KABA 2016



MISSION OSANG

..Tanü tensa tenyaba nung temulungjang tasen aser shisatsü meyipba taküm..



**Deacons, Mission Board
aser Mission Week
O jembirtem**

**Missionaries
Commissioning-
KABA lenir den
missionaries'
kibong aser yimertem**



**Mishmi Baptist
Church Council
aser
KABA Mission
Board lenirtem**

KABA-i yariba Evangelists



Subhash Singh
Uttarakhand



Harender Prasad
Uttarakhand



Kamal Chakraborty
Kohima



Kameshor Singh
Kohima



Yabaraj Sah
Nepal



Sanjay Pantati
Assam



Elea Hereh
Dimapur



Sojing Minim,
MAM, Arunachal



Nabin Mandi
West Bengal



Robert Joy
IEM, Chennai



Onentiba Jamir
Thailand



Bendangakum
Thailand



Sentienla Longchar
Thailand



Rongsenkala Jamir
Thailand



Meyikumzük Ozüküm & Kibong
NCF, Dehradun



David Walling & Kibong
Uzbekistan



Sakurepba Tzüdir & Kibong
NCF, Mumbai



Khuzhoto Rhakho & Kibong
NCF, Ahmednagar



Benjamin Kichu
NCF, Mizoram



Toshi Jamir
NCF, Mysore



Lanuyanger Ozüküm
ASIA Soul Winners, NEI

2016
MISSION OSANG
Volume 2

Copyright: Kohima Ao Baptist Arogo

Editorial Committee:

Dr. Bendangyapangla

Mr. C. Temjen Jamir

Mr. Lanu Jamir

Mr. Moanochet Amer

Rev. Arenla Longchar

Cover Design: Bendangtuba Longkumer & Moanochet Amer

Layout design: Mr. Moanochet Amer

Printed at : N. V. Press, Kohima

KOHIMA AO BAPTIST AROGO

P.O. Kohima 797 001

Nagaland, India

Contact No. – 09436603190 / 09856258382

Email: aoarogo@yahoo.com

kabamission@gmail.com



Keta Alibatem

<i>Pastor menden nungi</i>	1
<i>2016 Mission Report</i>	2
<i>Women Ministry 2016 Mission Osang</i>	7
<i>KABA Youth Ministry Mission Mapa</i>	9
<i>Christian Education Mission</i>	11
<i>Evangelistic Committee 2016 küm inyaka aruba Osang</i>	13
<i>2016 Sarasadem Committee Osang</i>	15
<i>Father School</i>	16
<i>2016 KABA Mission Week Osang</i>	19
<i>Tanü tensa tenyaba : Tangatetba tasen</i>	25
<i>Uzbekistan nungi Osang</i>	29
<i>2016 Naga Christian Fellowship Dehradun Report</i>	31
<i>Tesüiba aser tarutsü indang repringba</i>	34
<i>Mumbai nungi Naga Christian Fellowship Osang</i>	36
<i>Kathy's Home Thailand nung Mission</i>	37
<i>Naga Christian Fellowship Mysore 2016 Osang</i>	38
<i>Missionary 2016 Report</i>	40
<i>Naga Christian Fellowship Aizawl Osang</i>	43
<i>Missionary 2016 Report</i>	46
<i>KABA Mishmi Agape Mission 2016 Osang</i>	48
<i>Mishmi Agape Mission Centre nung Children Ministry Osang</i>	50
<i>Thailand nung short term Missionary Osang</i>	51
<i>Tatempang maliba mission mapa Tetenzükdak</i>	53
<i>Uttarakhand Mission Trip Osang</i>	55
<i>Nsong Mission Trip Osang</i>	58
<i>DUDU Colony nung Tsüngtong Tenyaba Mapa</i>	59
<i>Myanmar Naga Tenyaba</i>	60
<i>ASIA Soul Winners 2016 Osang</i>	62
<i>Chhattisgarh nung short term Mission Mapa inyakba Osang</i>	65

Pastor menden nungi.....

Rev.M.Asangba Longkumer

Tamanger shia kuliser

Temeim amangba purtem 2016 kum Tsüngremi asen arogo nem inyaksü nungloktsüba ama, amangba purtem ajaki pei akok yari mission nung shilem tajung agiogo. Iba atema kija aser kibong ajak dang kanga pelaba shisemer. Tamanger shia kuliser ka ama, arogo telung nung, aser arogo atena oer alima tesem palala nung inyaka arudang Tsüngremi kanga yariogo, item ajak asoshi Tsüngrem nem tenüngsang tetushi agütsüdi.



Mission puti meteter Dr.A.J.Gordon-i yamai ashir. “Koba arogoi mission mapa meinyaker, iba arogoji yakta dang samadoktsü.” Anungji arogo taküm alitsü asoshi missionji nisung ka temang nung tongtired amai lir ta angatetdi. Arogo nung züngsem shiaji kuliser ta laishiba ajanga angateter.

Yohan tapu 4 (pezü) nungji reprangdangrapangla Samaria tsür nüktapangtalai kodang Yisu ajuru aser Yisui agütsüba taküm tzü kodang lai agizük, idangjisa terata tetsübu tarendak kecha meli-i lai am -ah aliba tzü mori toktsür lar yimtaki ao. Aser lai yimertem dang lai ajuruba Yisu indang kuli asü. Yamaji lai yimertem Yisu dangi anir aru. Kodang Samaria nunger-i Yisu ajuru parnokia Yisuji Tsüngrem Chir ta angatet aser amang.

Daniel, shiba Darius chuba yimli nung kanga dang meraketa, merena chuba sülen tatong menden nung mener ochishia yimsüsüya liasü, pa atema mission fieldji Darius chuba yimliji liasü. Pai paji missionary ka ta mesangdong saka pa mapa agi dang sayu. Daniel den külemi yimsüsüba menden nung ajungketa mena alirtemi, pa anema tasa tamajung asa. Saka pai tangatetba nung marakzüi akanga ametter, Tsüngrem den telongjem sarasadem koba anogoshia agiya liasü ibaji meraksai agi. Pa ochi nung noktaker missionary ka ama lia sayuba ajanga molusongzü kanglai yok. Sakasa molusongzüia pa dak mekongshitet.

Daniel-i pa sasa telok nung noktaker Tsüngrem kuli masü, saka Yihova Tsüngrem memetetba limapur chuba-i, Daniel-i amangba Tsüngremji shiba? ibaji kanga dang jangja jangja-a angateta aküm. Daniel Tsüngrem indang Darius-i yamai pa yimli nung sangdongbaji angur.

Daniel 6:26-27 “Kü yimli yimsüsüba ajak nung Daniel Tsüngrem madang atentenang aser tsübuang ta ni ozüng ka yanglur. Kechiyong pa taküm Tsüngrem, teti marakzüi aliba, aser pa yimli kodanga mesamatsü, aser pa yimsüsüba teti tatem tonga alitsü. Pai kümzüker aser soter, kotak aser alima nung pai temaitsü aser tesüngmangtsü inyaker, pai molusongzü ain nungi Daniel kümzük”

Danieli tamanger missionary ka ama pa menden nung mener ochi shia pa mapa agi kuli asüba ajanga, Tsüngrem memetetba lima nung, Tsüngrem memetetba chuba kati, Tsüngrem memetetba yimli ajunga nung Yihova Tsüngrem indang kuli asü. Tanüa na tamanger ka ama koba office nung amener, idakji ochi shia missionary ka ama inyakra tangari nü dak Yisu angutsü, aser iba jagi samaa aliba tanelatem aika Yisu dangi anir arutsü.

Anungji KABA züngsem shiai Tsüngrem kuliser ama alitsü ayongzüker. Tsüngremi moajang.

2016 MISSION REPORT

- Rev. Arenla Longchar

SOUTH BANK BAPTIST MISSION -

Küm 5 tsüngda nung South Bank Baptist Mission toktsütsüba mapa taküm December ita tembanger. Tekam Mising Baptist Kebang tenzükertem den Bethel Christian High School nung tatembangba telongjem (sending) akatsü. KABAi sen agi yariba mapa tembangaka tanela mapa nung akokba tashi yariteptsü.

MISSIONARY COMMISSIONING –

February 14, 2016, anogo nung missionary Sentienla Longchar (Mangmetong) aser Onentiba Jamir (Mopungchuket) Thailand lima tenyaba mapa inyaktsü commission asü. Parnok den kulemi Tiamoa Yaden aser tebuttsü Sobuienla (Merangkong) Mishmi Agape Mission, Arunachal, nung tenyaba mapa inyaktsü commission asü. Kohima Mangmetong Fellowship, Kohima Mopungchuket Fellowship, Kohima Merangkong Fellowship aser Merangkong Baptist Arogo nungi arua fellowship sarasadem mapang tajung ka liasü.



**THEOLOGICAL & SECULAR DEGREE
SCHOLARSHIP –**

Taküm küm nungi Students 21 nem theological scholarship agütsüdagi aser student ka nem secular study nung agütsüdagi.

MISSION PARTNERS –

Item teloktem den KABA-i partner
süa mission mapa 2016 küm inyaka liasü.

1. Indian Evangelical Mission- missionary Robert Joy, South India, ita sen agütsür.
2. Nagaland Missions Movement- NCF pastor 5, Thailand nung Sentienla, Onentiba aser Akokla itasen agüja yarir.
3. National Fellowship- a) Missionary Nabin Mandi, W. Bengal itasen agüja yarir; b) Kohima nung Bengali Fellowship Evangelist yarir.
4. DABA den semtepa 2015-2017 tashi Delhi Ao Baptist Arogo Youth Director itasen agütsür.
5. Assam Valley Baptist Mission Evangelist Mr. Sanjay Pantati itasen agüja yariba.
6. Thailand Karen Baptist Convention nung inyaktsü short term missionary yokba.
7. Great Commission Thailand-iba telok

den Rongsenkala aser Bendangküm inyakdagi.

8. Multi Community Church Association- 1) Evangelist Subhash Singh 2) Harender Prasad tena asür Matsung Pongener Grant nungi teyari agütsür.
9. ABAM Church and Mission den semloktepa missionarytem yoker.

HOME & OUTREACH MISSION –

Dudu Colony Outreach Ministry, Dimapur- Idaki amongnü shia telok tila ka telongjem agir. Tamanger tasen 11 taküm baptia liasu. Idaki Muslim telok tulu aliba ajanga aikati temlung ulua Khrista agizüka tamanger akümtsü tsübur. Schooli maoer tanurtem parnok 80 shi hombar nungi hokolbar tashi Learning Center nung atener. Bibles aser 1700 tracts Hindi, English, Assamese, Bengali oshi nung mamanger nem agütsür. KABA Women Dept.i anogo ka holistic training agüja liasü. Hindu, Muslim aser tamanger tetsür ajak agi 43 training nung aten. Oct 20-23, 2016, tanurtem ministry KABA lanurtemi agi, iba nung tanurtem 93 tashi tena temoatsü tulu angu. October 30,



Dudu colony nung mozer angati akatsu

2016 nu Evangelistic Committee aser medical team kati health camp ka kaa liasü. Sarasadem aser lemsatepa tekülem agia nisung 561 nem medical treatment agütsü.



Dudu colony Oct 30, 2016, Free Health camp



Dudu neburtem tanepesü bushir

Kohima Bengali Outreach Ministry –

Evangelist Mr. Kamal Chakraborty-i kanga meranga Kohima nung Bengali nungertem semdangogo. Kohima Bengali Fellowshipji KABA main church nung tasembuba amongnü senteper. Taoba küm Bible Study telok tila ka Merhülietsa nung tenzüka kanga jangratepa iba Tsüngrem O bushiba sendong agidagi.



Kohima Bengali Fellowship küm ka anniversary



Free Health Clinic – bendanga agütsüba doctors aser nurses aser teyaritepertemi Free Health Clinic temoatsü aser takok tulu ngua agiyonga arudagi. Taküm küm shirangertem ajak agi 1698 tashi nem teyari agüja Free Health Clinic agiogo.

Short term Vocational Training (Project Ergon) – Khristan ministry ajak nung tanela aser nisung taküm renlokdahtsüba mapaji tongtipangba lir. A.G nung sensaker studentem parnok 10 nem taoba küm 4 tashi angati tuition agüja arudagi. Parnok azüngba nung terenlok kaa tajungba akümba angudang kanga pelar. Merhülietsa nunga tanur 10 asoshi kasa sendongji tenzüko. Lanur parnok 5



KABA Project Ergon ajanga A.G. nung free tuition agutsür

NIELIT nung Computer Science nung register sütsüogo, parnok nisung ana ita 6 course agidagi. Alternative Part-time Helper (APH) sendong maneni junga odagi. Iba sendong ajanga mapa makartema sen terara aatsü leman lapoktsür aser KABA nung züngsemta teyarir tajung ngua tajangzüko angur. Skilled Workers' Directory ta jar list adoka lir aser iba ya mapangsertemi kibong shia nung alemer; asen nisungtem mapa inyaker aika lir saka asenoki tsümartemang timba amshir. Ajisaka asen nisungtem nem iba maongka agüja yariteptsüji kanga tongtipang lir. Iba ama



Merhulietsa nung Free Tuition

teyaritep ajanga asen Kibuba Tsüngrem tali sentsüwangshidaktsüsü.

Garö Baptist Church, Kohima – Ita nung tasembuba amongnü iba arogo semdanga

Tsüngrem O lemsatepa ajanga theological graduates aser lenirtem aika maongka tajungangur.

KABA Missionaries & Evangelists- Asen arogoi toklang tenzucker missionary 14 aser evangelists ana yua lir. Ano asen arogoi evangelists 6 nem tanga telok den semloktepa ita sen agütsür. Parnok tamang tongpang nung noktakdang iba lima tamang tashitem nungi parnok kümzüka yujang ta asenoki maneni sarasademtsüdi.

Short Term Missionary (STM) - Thailand nung Great Commission den short term missionary inyaker parnok 3 taküm January ita nung meyipa aruogo. Short term missionary ka Tabitha Academy, Kohima, nung ita asem mata-mabensaba tanurtem den inyaker anenogo. STMs ana tang Dehradun aser Arunachal nung inyakdagi.



Thailand nung hostel tanurtem ministry

Literature Ministry – KABA nükjidong rongnung kaji Ao arogo tilatem nem kaket tenla agüja library tenzüksü ajungshibaji lir. Taküm küm item arogotem nem agütsüogo- Meyilong Baptist Arogo, Tzüsapang Baptist Arogo, Longjonkong



BaptistArogo, Aoküm Baptist Arogo and Akumen BaptistArogo.

Myanmar Naga Project : KABA-i Myanmar nung Kaisen lenirtem parnok asem nem itasenagütsür. Taküm küm nungi students 10 yaria Ronghi (Donghi), Myanmar nung school züngdagi. Asen



Tanurtem dang tesayuba mapang



Arogo-i yariba Myanmar Naga tanurtem

arogoi idakji hostel ka tenzük aser warden ka shimogo. Rev. I. Bendangmeren aser Mr. Temjenmongba Sempo tena Myanmari November to oagi parnok semdanga ajungshir aru. Iba osang kaket nung parnok aoba osang Rev. Bendangmereni zülüba angutsü.

Naya Jeevan Church Leaders Training – Iba leadership training ya October 8-9, 2016 nung kaa liasü. Iba arogo ya temeyoktep telok tila ka dang süaka parnoki Assam nung mission mapa inyaker aser Aradura nung fellowship ana tenzüka lir. Item fellowship asem nungi lenirtem parnok 30 shi arua iba training nung aten. KABA-i iba training sponsor asü aser iba sentong nung tesayurtemji Rev. Yashila Jamir, Tiatoshi Longkumer, Rev. I. Yapang Walling and Rev. Arenla Longchar liasü. Parnok züngsemtemji tawa-tanüang Khristan akümba nebutem lir aser parnok tejangraba tulu nung arua atenba aser angazüknüba ngua onoka tajungshiba tulu ngua liasü.



Naya Jeevan Baptist Church nung church leadership agiba Oct 8-9, 2016



Er. I. Rongsen-i meranga MAM ki tem yanglu

Mishmi Agape Mission (MAM) ki meshitetba sentep – KABA nungi 15 nisung Arunachali lua September 23, 2016, MAM Center nung ki temji Rev. M. Asangba Longkumer-i dedicate asü. Iba sentong nung parnok nebur 200 tema aten. Tsüngrem temoatsü bilemtettsü asoshi süngdong ishika Center nungji tema toktsü.



Dedication anogo bilemteta sendong atem



Tarutsu mapang nung iba anogo bilemtetsu atema



Dedication anogo bilemteta MAM Center nung sungtong tema toktsu

WOMEN MINISTRY 2016 MISSION OSANG



Rev. Yashila Jamir

2016 küm Arogotsüri mission mapa nung shilem agiba kar lemsateper

HOME MISSION

1. *Learner's Cell*

Iba sentong asemben (3) agia liasü:

Mezüngbuba telok- April – May tsüngda Wednesday anogo 8-nü agia liasü. Iba cell nung Kiyim Lanutsür 44 tena liasü. Onüktemji Christian Home, House Keeping, Home Economy, Good Parenting, Nutrition, Etiquette, Cooking & Baking, Women's Health, First Aid & Eye care & Mother's Craft liasü.

Tanabuba telok- Tenzükla temeja May 21, 22 & June 6 nung agia liasü. Iba sentong nung tenzüklatem 72 tena liasü. Onük sayubatemji Home Economy, Awashi, Formal table setting, Cooking, Baking, Dessert and Pickling liasü.

Tasembuba telok- August 5, 6, 12 & 13 anogotem nung aiürtem (23 years & above) temeja liasü. Iba sentong nung aiürtem 37 aten. Subjects sayubatem Christian Lifestyle & Integrity, Flower Arrangement, Paper Craft, Health & Nutrition, Etiquette, Self-Esteem, Aor Sobaliba, Jayajago, Kibalemboba & Awashi, Cooking, Baking & Dessert liasü.



2. *Christian Women Leadersip Building Training*

“Aniang” omen nung ajemdaker CWLBT anaben agia liasü.

Mezüngbuba telokji July 17, 30 & 31 anogotem agi . Iba training nung sayuba



onüktem yamai liasü: Homiletics & Sermon Preparation, Baptist Arogo tesayuba, Grooming, Christian Leadership & Communication skills, Personality Development & Self Esteem. Tanabuba telokji August 20 & 21 tenzükla temeja JMC nung agia liasü. Iba training nung sayuba onüktem yamai liasü: Yisu Mesükba Lenir, Personality & Effective Communication, Christian Leadership.

3. *Holistic training*

KABA küpok A.G. Fellowship aser Lerie Fellowship nung aliba küm 50 teküpokpurtem tetsür 50 nem 7th & 8th of October nung Holistic training ka agütsü. Iba training nung Awashi, Home economy, Cooking, Baking, Pickling, cutting & stitching sayua liasü.



4. Home visitation

March- October tsüngda Tenzüklatemi Kohima nung Aotsür tangar kintem den kibong kümer alirtem kidangi oa sarasadem telongjem tajung agia laisü.

OUT REACH MISSION

1. March 10 nü Rev. Yashila Jamir-i anir tenzüklatem 8 Dimapur-i lua Arogotsür ajak tenüng nung Rev. Dr. Noksangla aser kinungertem den telongjem tajung agia liasü.
2. April 1 nü Rev. Yashila Jamir-i anir Arogotsür nisung 5 Dudu Colony-i lua Women Holistic Training ka agütsü. Iba training nung Nepali, Adivasi aser Assamese-tsürtem ajak agi 43 aten. Onük sayubatemji health & hygiene,



nutrition, mother's role in a family & relationship. Iba dak alaka cutting & stitching sayu.

3. April 7-10 Pongro Town Baptist Arogo nung Tetsür Holistic Training tajung ka agia liasü. Iba training nung Naga Burmatsür aser Yimchungertsürtem ajak agi 56 aten. Yimya awashi, temang anepalutsü, kibong nung tesentaktep aser Bible study tesayuba agütsü. Iba den ano cooking, baking, cutting and stitching tesayuba agüja liasü.
4. May 28 & 29 Meitei Baptist Church Kohima tetsürtem nem Holistic training ka agutsü. Iba training nung Manipurtsür aser Nagatsür ajak agi 40 tena liasü. Onük sayubatemji Healthy living, Etiquette, Christian home, Cooking, Baking, Pickling, Cutting & Stitching. Iba dak alaka Deobar Devotional sentep nung shilem tajung agia liasü.

KABA YOUTH MINISTRY MISSION MAPA INYAKBA OSANG-2016

—•••••—
Tiatoshi Longkumer,
Director Youth Ministry
—•••••—



2016 KABA Youth Ministry-i Mission mapa inyakba osang tongmelang agi lemsateper:-

- 1) August 12 – 14, 2016 Mr Tiatoshi Longkumer, Youth Director – i anir lanur 8 tashi oa Youth Camp ka Mumbai Naga Christian Fellowship nung agüja liasü. Iba Camp nung Mumbai NCF member 78 shi aten aser KABA nungi Praise & Worship team aser sayutsüngi balala ajanga Mumbai NCF members aika tanela nung asüngsashia Khrista nem taküm bendanga agütsüba mapang ka liasü.
- 2) August 7 2016 Heritage Kohima nung Yimya Balaka nung Asortem den Mr Tiatoshi Longkümer ,Youth Director-i Tsüngrem O tulu agi ajungmesoa parnok den Tsüngrem temeim lemsatepba sentong ka agia liasu. Yimya balaka nung asortem Youth Ministry-i adopt süa alir ajak agi parnok 32 lir, aser parnok rongnung 20 tangar kin aser 12 asen nisung lir.
- 3) May 31 nungi August 17, 2016 KABA CARE ministry ajanga Kohima Jila nung aliba Footpath Overbridge pezü (4) tashi merükmejua colored- design painting mapa inyaka liasü. Lanurtem Volunteer nübu 300 tema agi iba mapa nung



yaritepogo. Anogo 75 tashi nung iba mission mapa takok tulu ngua tembanga inyakogo.

- 4) 2nd July aser 26th November 2016, KABA CARE ministry-i ayonga yinti Cleanliness Drive Kohima kiyong ajak nung inyaka liasü.
- 5) September 9-11, 2016 KABA CARE Destination Mokokchung, Theme, 'Caring God's Own World' nung ajemdaker arogo nungi lanur 35 tashi oa Mokokchung nung Arogo 10 den teka amteper Environment Campaign sentong tulu takok ngua inyaker aruogo. Iba mission nung sentong yamai inyaka liasü: September 10 - Go Green Marathon Race, Cleanliness Drive aser Mkg Town Hall nung Worship Nite sentongtem agia liasu; September 11 - Arogo 6 nung Devotional sentep bendanga agi aser CTC nung Student tem den sentong tajung ka agia liasü.
- 6) 2016 küm piyong nung kiyong Youth Fellowship ajaki anaben(2) tashi Street Ministry sentong Kohima Town nung kanga dang temoatsü nung agia arugo. Kohima Town nung tongtipang Junction tem nung lanurtemi Tsüngrem O aser Ken ajanga khuli süa inyakba, Tzümar (non-locals) tem den teyaritep mapa inyaka sarasadem sentong agi. Item Street Ministry mapa lanurtemi tasü ita Tsüngrem khuli asüba ajanga Kohima nung aliba nüburtem kanga dang temoatsünguogo.
- 7) Naga Hospital Kohima nung ita shia Hospital Ministry KABA lanurtemi inyaka liasü. Iba ministry ajanga shirangertem den Tsüngrem O lemsatepba aser sarasadem agüja mapa tajunginyaka arudar.



KABA CARE



Yinti Cleanliness Drive



Hospital Ministry

CHRISTIAN EDUCATION MISSION

—❖❖❖❖❖—
Mrs. Alice Walling
Christian Education Director
—❖❖❖❖❖—



2016 Sunday School tanurtemi mission tenla bendenba item arogopur nem Sunday School atema teyari agütsü. 'Asenok ajaki mapa tulu inyaktettsü makok, saka temeim agi sünga mapa tilalabo inyaktettsü' Mother Teresa

Tanurtemi mission atema agütsütsü angazüktsü aser inyaktsü atema küm shia Mission anogo amonger. Iba anogo parnoki bendenba tenla nungi mission mapa tilala inyaker. 2016 küm tenla aika dang benden. Iba tenla nungi inyakba osang yamai agütsür:

- i) Theological student ka nem arogo mission ajanga scholarship Rs. 24,000/- agütsü.
- ii) Arogo tila asem nem tila tanurtem atema special sentong ka katsütsü Rs 15,000/- each tenla.
 - i. Aoyim Baptist Arogo
 - ii. Kinunger Baptist Arogo
 - iii. Satsük Baptist Arogo

Parnok nungi anguba osang kar:

Aoyim Baptist church, Dimapur

Aoyim arogo one day Children Retreat akaba ya mapang shidak nung aka ta Tsüngrem tenung asanger.

Aoyim nung tanur aika kümogo, aser parnok asoshi teinyaktsü wadang tulu lir ta ajiteter, saka Arogo tila aser rongsen lenmang temesü, ibajagi tebilemba kecha meinyakteti alidang mapang shidak nung Kohima Ao Baptist Arogo Children ministry nung inyaker den Tsüngremi jembisüdi.

Retreat katsütsu osang tajung angashia tesayur tajung ana bushia 22nd Oct. 2016 anepdang 8:30 – 6:00 PM tashi 'Tanur shia dangi tekümtet osang' iba omen nungi agiogo. Tanur ajak agi 24 iba Retreat nung aten.

Honibar aonung tekülem nung parnoki angazükba saya aser tetoktepba nung takok angurtem nem senpet agütsü. Iba ajanga tsürabur nem tajungshi tulu agütsü. Ya nenok sarasadem aser rongsen teyari tulu ajanga inyaktet.

-K. Imti Ao Secretary

Kinunger Baptist Arogo

Nenoki sen bener yokba atema kanga pelar. Iba sen ajanga Child & Sunday school tanurtem nem sentong ka yanglua anepalua inyaka arugo. Temoatsü sentong ka liasü.

Tanurtem ajak agi 20 liasü aser tesayur 3, Y & CE Director 1. Sentong yamai agia liasü:

- 1. Tanurtem nem shilem balala agiba nungi senpet alia agütsü*
- 2. Tanurtem nem sentong agiba mapang chiyongdaksü*
- 3. Item nungi tanüngba Arogo 17th & 18th December 2016 Centenary amongtsü, iba sentong nung tanurtemi shilem ka agitsü lir. Yangji ternemshiba mapadong nung amshi. Kibuba mepa nung tenzüker,*

*(Ms. Alemkala)
Director, Y & CE*

*(Rev. Moaliba)
Pastor*

Satsükba Baptist Arogo

Nenok ajanga ozü Satsükba Arogo Child Ministry asoshi telumungtetba tulu nung koba teyari yok ibaji mapang shidak nung Rs. 15,000 angu.

Iba rongsen ajanga onoki Dec 27-28 nung Child ministry (winter camp) sentong akatsü renemogo ta osang tejangja telemtetba metetdaksür.

Nenok teyari ajanga ozü Arogo nung Child ministry temoatsü tulu angutsü sarasadema atadi. Tsüngremi KABA Child Ministry tali moajangma ta ozü arogopur tamang sarasadem.

Mr. Temjen Amri, Pastor



*“Laishibaji mission tamentakdakmasü; Laishiba tamentakdakji mission lir”–
Ralph Winter, Missiologist*



EVANGELISTIC COMMITTEE 2016 KUM INYAKA ARUBA OSANG

—•••••—
-N.Wati Atsongchanger,
Evangelistic Committee Convenor.
—•••••—



- 1) February ita nung orientation sentong tajung agi, aser sector ajak nung committee mapatem tenzüka ao.
- 2) Committeepur atema one day training Dr Lulen Dimapur nungi jaoka agi.
- 3) Dimapur Area nung Nagamese Arogo pezu aser Kohima nung Arogo ana semdanga sentepem nung kuli sua liasü.
- 4). Hostel ministry maneni iba kuma inyaka liasü.
- 5) Kiyong ajak nung kiyim lanu kibongtem semdanga sarasadem agujaliäsü.
- 6) kiyong ajak nung aonung sentep ka exchange sua agia liasü.



Dudu colony Oct 30, 2016, kulisuba mapang

- 7) Free health medical team den kulemi committeepur nisung 16 densema anogo ka Dudu colony Dimapur Nagaland gate anasa conseling aser sarasadem agujayaritepa liasü.
- 8) Tsüngtong tenyaba mapa atema Orang district Assami oa anogo asem monga tenyaba mapa inyaka liasü. Tenyaba mapa inyakba kar yamai



lemsateper - Oraon Baptist Churches Association Chirang District, Assam nung lir, asen Arogo nungi Evangelistic Committee-i October 20 – 23, 2016, nung semdang. Asen arogopur tamang sarasadem ajanga Oraon Baptist Churches Association nung aliba amangbapurtem dang nungi onok taortem tali temoatsü ngua liasü. Iba mission field ya Chungliyimsen Baptist Arogoi yaria aru saka 2016 küm nungi Chungliyimsen Senso Mission asütsü lemteter inyaka odagi. Iba mission field ya 1998 küm lapok aser 2014 nung küm 25 abensaba Jubilee mongogo. Iba mission field kübok arogo ajak agi 18 lir aser iba mission field nungsa Bethesda English School kanga junga odagi. Tamangertem ajak agi nisung 2200 lir. Iba mission field ajanga item tongtipang district 3 nung Tsüngrem mapa inyaker: Utaguri, Chirang, Kokrajhar

Iba mission field ya Outreach Missionary Mr. Talitemjen pai anir

maparen ajak takok ngua inyakdaki. Mission Centre nung Executive Secretary ka lir aser iba mapa ya Bethesda English School nung tesayur kati taa magi-i inyaker. Ano pa den yariteper Field Director ka aser Evangelist 3 lir. Parnok ajakji ita sen terara agia inyaker. Ano arogo teimba ka nung Sannükertem taa makai dang inyaker. Parnok tangatetba tajung den arogotem rongsen nung kanga timatempa ajiteta liasü.

Onok team ana küma lemdang aser arogo ajak agi 9 semdanga liasü. Shirangertem aser teret/tezü raksartem yaritsü asoshi nisung tabensa aser mozü teperi bener ao anungji shirangertem aser timtemertem aika mozü agüja yariba den parnok den sarasadem tajung agia liasü.

Iba mission field joko küm 27 tain saka iba field lapoker tanga arogoi arua semdangba ya asen arogo mezüngbuba liasü. Chungliyimsen Sensoi asen arogo dang kanga pelaba metetdaksü. Chungliyimsen Senso, Outreach Missionary-i anir Mission Centre aser arogo nung tenzükertem aser amangba pur ajaki asen arogopurtem dang Tsüngrem temeim salem metetdaksü.

Arogopur ajaki sarasadem nung yariba ajanga onok kecha timtem makai mapa ajak takok ngua inyaker aru. Oraon Baptist Churches Association nung tenzükertem aser amangbapurtem asoshi ajaki maneni sarasademjangma.

Tsüngremi tazünger ajak moajang.

2016 SARASADEM COMMITTEE OSANG

—❖❖❖❖—
S. Rongsen,
Convenor, Sarasadem Committee
—❖❖❖❖—

1. Kum tsüngda sarasadem Committee aser Arogoi ayungzukba prayer and fasting anaben agia liasü.
2. Kum piyong kiyung ajak nung Sarasademba Committee-i achaayanga prayer walk kohima temeket tesem balala 70 tashi nung agia liasü.
3. Shiranger, timtemer aser tasurtem dangi oa sarasadem den teyari agütsüba kibong 386 liasü
4. Kimoker dangi oa sarasadem agutsüba den arogo nungi teyari agutsüba kibong 37 liasü.
5. Kum tsüngda Committee pur ajak asoshi training tajung ka aka.
7. Ita nung Mezüng Bodhbar aonung sarasadem acha-ayanga agia arü.
8. Matric aser tema exam agtsürtem atema sarasadem kibongtem dangi oa agütsü
9. NBCC-i ayongzukba prayer seminar ABAM tenung nung committee nungi oa aten. Aser ita shia Monday anepdang sarasadem nung dena shilem agia arüdagi.
10. Kum tsüngda nung committee pur telongjem asemben liasü.
11. Kohima to Tuensang tashi Prayer Journey April 15-16, 2016, sendong tajung ka aka. Tattsü agi yamai lemsateper - Asenok ajaki tanü Naga lima tensa mepong memetet ama, memetetba aser meimlai aliba mapang ka nung item tia tamajungi aiben asenok temulung zürepdaksür aser taoksatsü lendong ataloker. Item ajakji asenoki Tsüngrem temeim nungi atsüngzüka aoba agi aser temenen mojing nem mapa tamajung inyaksü lenmang sadema yutsüba ajanga lir. Mapang ka Tuensang lima nung nübur-o-nübur na tsüngda tepela tesünep samar, tetsübu terata agi amangba-pur mulungjang sünga liasü.

Item tongpang den raratsü aser parnok asoshi sarasademtsütsü nükjidong nung asen arogo nungi Sarasadem Committee züngsem onok 51, Taküm Tsüngrem dang taochi takokba meshia sarasadem Tuensangi apusoa ao. Aser Tuensang jila tesem 8 tashi nung Yisu tenüngnung temenen tanela mapatem merüktetjang ta sarasadem agia jaja-a liasu. Taodang aser tarudang lemanng tesem aika nung sarasadem takok ngua agia liasu, item ajak nung Tsüngrem teyari atenba balaka meteta temoatsü tulu onok taor aser yangji aliba nebur ajaki meteta liasu.

Tuensang Ao Arogo-i tanendak, chiyongtsü aser nüngdakba ajak agütsüba asoshi kanga pelar. Sannükeri anir arogo nung tenzüker, tenzükla ajak Kibuba Tsüngremi Pa wadang asoshi maneni moajangma.

PRAYER WALK:

Kohima temeket nung item tesemtem ya kanga tanü asen Naga nübur asoshi kanga tongtipang:

- 1) Kisama 2) Kohima Science College 3) Indira Gandhi Stadium
- 4) NPSC Office

Anungji tensa mapang apir anogo balala nung item tesemi or Tsüngrem nem bendanga agüja-a sarasadem agia liasü. Küm tepiyong maparen ajak takok ngua inyaktetba ya KABA nung amangba puri tamang agi sarasadema nungitba ajanga lir ta pelaba lemsateper.

FATHER SCHOOL (Taküm Melenshiba Osang)

Sentisashi



Father School agir külen Follow Up / Reunion mapang 'Fathers' balala nungi parnok taküm nung temelenshi aser temoatsü lemsaba kar:

“...kü kinungtsü kena meimtepa dang lia arur saka Father School nung tesayurtemi pei kinungtsü tali meimtsü aser mapang ajak nung la dak tajung ajiteta 'junger' ta shiang ta ashiba ama, ni kanga meranga inyaker. Tangbo ni la ajungba aser la dang pelaba 'khen' ashitang, lai ni ajungba aser kü dang pelaba 'anabenbo' shia toker alir. Father School sülen kibong nung tepela balaka lir...tanabuba nung, ni yi khen khen jema aru saka Father School nung ni yi majemtsü arogopur ajaki angashia nangzük, tang tashi nung yi tzüjang kata memenakdangi lir. Ni aser ozü kibong atema sarasademjangma.”

“...ni kibong kümli nungi kü kinungtsü den akokba mapa ajak nung yaritepa aru. Talisa ki mapa balala nung ni kecha tarendak mekai akok tashi yaria aru. Kodang Father School nung atentsü asüngdang, nibo junga lirji kecha masü ta khenbo bilem saka oda oa aten. Iba School nung ni kü mabensaba aika meteta aru aser iba rongnung ka dang ni yamai lemsatepner; “Father School nung maten tashi kü tangatetbaji yamai liasü, “kibong tekülem anitsüba mapa ya tetsür mapa.” Father School nung atendang tebu kaji kibong nung putir ama lir aser kibong tekülemji pai ayonga agitsüla ta angatet. Iba mapang nungi tang tashi ni ozü kibong tekülem nung shilem tajungtiba agia arur.”

“...father school nung ni kübu dangi shiti





ka zülu. Pa süadoker aji saka ni shitiji kanga junga zülur tesayurnem agütsü. Father School agir ita asem buba nung kenü office nung mena lia, kü dangi post ajanga shiti ka aru. Tanemka nungbo kü dangi shiti marur, anungji mamangtetika shitiji bena aru nung, ni kübu dangi züluba shiti to liasü. Office nung iba shitiji shiboka azüngdang, kübu menungraba aser pai tajung inyakba ano talila aika bilemteta aru. Ni iba shiti ngur tasüngji kübu

asüba anogo liasü anungji ni yamai inyaktsü mulungtet. Asüng aonung ozü kibong tekülem mapang nung kü kinungtsü aser tanur ajak nem iba shiti züngdaktsütsü aser kübu asüba anogo tenüng nung pa taküm otsü aser kena koma lia aru iba indang jembitsü. Tasüng aonungji ni bilemba ama inyak aser ozü tanur dang kübu kena lia aruba otsü nungi tongtimbang onük aika lemsatep. Father School nung temoatsütem aika anguba rongnung ibai ano talila temoatsü liasü.”

“...ni taküm nung sentepi moutangi aru. Father School nung tebu kati sentepi meranga aotsü sayuba agi kü dak kanga kongshi. Father School sülen tang tashi nung sentep ka danga mezüi aor. Ni bilem nung ni taküm piyong nung sentepi oa aruba aser tang Father School sülen ita asem tsüngta sentepi aoba naji bendendang nung, Father School sülen aobaji kanga agi teimba asütsü.”

“...ni taküm nung kodanga ola atoka sarasadem mesüdangi aru. Kibong sarasadem agidanga temulung nung dang sarasadem, aser sentep ki ama nunga lokti sarasademdang ni kodanga ola adoka sarasadem mesüdangi aru. Küm asem tejaklen ni Father School nung aten aser Father School tatembangba aonung kidangi shilanger külen, kü kinungtsü kena tenüngsang agüja sarasademdang, 'ni ola adoka sarasadem.' Kodang lai aji angashi, la



tepela nung kangadang temulung shirang kechiyong kibong kümer küm metsü tema lia arudang lai ni sarasademba khendanga mangashidangi liasü. Ita ana asem ka süir, ozü jala college nungi sodi aru aser iba aonungji kibong sarasadem mapang agi. Tasügnepji ni yimdongi or lia, ozü jalai tetsü dang, “yasüng sarasadem mapang nung kübui ola adoka sarasademba angashigo, pai kodang nungi

yamaji sarasademer” ta asüngdang. Tetsüi langzü, Father School atenba sülen nungi. Anepdang 9 AM shi nung ni kidangi arudang ozü jalai kü dang, “Oba, all the best!” ta ashi. Lai kechiba 'all the best' ta ashir ta ni anogo tepiyong kanga mangmanga bilem saka khuliji mangu. Paonungji ni kü kinungtsü dang, jalai 'all the best' ta ashiba terataji ashi nung lai yamai ashi. “Jalai taküm nung nai ola adoka sarasadembaji yasüng to mezüngbuba angashidangba agi, ano maneni yamaji inyakang ta ashiba asütsü” ta ashidangang ni terata nungi anen.”

“...ni asangwa mapang nungi yi jema aru. Sokar mapa ngur kibong küma orang ano yi teimba jema lia aru. Yi dakji alima nung aliba 'temenen' ajak sentakloka lir, aser iba jenjang nungji kü taküm sokar mapa nungi retirement ngua tashi lia aru. Saka Father School nung atendang kü taküm peyong alena aliba yi indoktsü ni angateta aru aser iba tangatetba nung lia ano Father School sülen KABA Men's Camp nung ia aten. Iba sentong ajanga ni yi meshimeshia indoktetogo. Yi yabo nibo kodanga meindoktettsü südi ta amanga lia aruba, tangbo iba tongbang kokogo, ni atema sarasademjangma.”

Arogo Mission Osang azünger ajak dang temepishibaji ya. KABA Mission mapa nung tongtibangtiba kaji Father School ya lir ta tangatetba nung, Father School ministry ajak Mission senpong nungi amshir. 2016 küm item arogo nung Father School agiogo: 1) Padumpukhuri 2) Darogapathar 3) Aoyimkum 4) Alongtaki 5) Khar 6) Akhoia 7) Chungtia 8) Kupza 9) Moayimti 10) Rengma Church, Kohima 11) Phom Church, Dimapur 12) Phesama Police 13) Alichen Police 14) KABA (7 fellowships).

2016 küm Father School ministry nung amshiba sen ajak agi Rs.17,00,757.00 (Seventeen lakhs seven hundred fifty seven only) liasü. Father School graduates ajak atema sarasademjangma.



2016 – KABA MISSION WEEK OSANG

Contributors - Imti Longchar, Sentienla Longchar & Charemnaro
Compiled by: Lanur Jamir

Arogo nung asentenshi tulu ka atokba sülen 1978 küm KABA ya 'Missionary Arogo' ta sarasadema sangtong. Aji sür külen arogo nung mission mangdang tuluba aser tejangjaba kümdaktsütsü nükjidong nung February, 1979 küm KABA nung Mission Week küm shia February tanabuba hopta nung amongtsü arogoi lemtet. Anungji KABA nung küm shia mission week amongba ya Tsüngremi apuoktsüba sentong ta angateter. KABA nung joko küm 36 shi mission week monga arudaki. Taküm küm mission week omen “Tanü Tensa Tenyaba nung Temulungjang Tasen aser Shisatsü Meyipba Taküm” liasü. Tesuiba kümtem dang nungi taküm küm mission week sentong tera balaka liasü. Iba sentong ajanga amangba purtem ajak tanela temoatsü nguogo ta imlar.



2016 mission week nung Tsüngrem o jembitsü asoshi arogoi sarasadema asüngdangba ama tesemtem balala nungi o jembirtem itemi aru:

1. Rev.Sonny Largado, Director, Ethnos Asia, Thailand
2. Mrs. Dahlia Largado, International Director of Deborah Ministries in Asia
3. Rev.Dr.Peter Xu, Back To Jerusalem, China
4. Dr.Paul Ma (Interpreter), Bible Society
5. Rev. G. Khing, Director, Asia Soul Winners, Nagaland
6. Rev.Phurpu Lhomi, Founder & Executive Director, Reaching Himalayas Ministries
7. Rev. Asinlo Khing, Coordinator of Himalayan Harvest Team of Ethnos Asia
8. Rev. Dr. Wati Aier, Principal, Oriental Theological Seminary
9. Rev. Moa Longchari, Pastor, Baptist Mission

Parnoki teküboklen agüja aliba onüktem Fellowship ajak nung melentepa jembia liasü.

- Nükjidong Tasen
- Tangatetba Tasen

- Mulungsentsü Tasen
- Temulungjang aser Shisatsü Meyipba Taküm
- Libaliro Tasen

Taküm küm Church Bulletin mezüing atok nung mission week amongba osang den o jembirtem taküm, mapa aser parnoki tayongzükba o ashiba tejangja atokogo. Anungji itemji lephsia matoker saka sentep shia parnoki Tsüngrem o jembiba tongmelang agi agütsür. Ibai ajanga Mission Osang azüngertem ajak moajangma.

Rev Sonny Largado:

Na shiba südir süang, asenok mapaji Khrista jangja ngudaktsütsü aser osangtajungji ajak asoshi tapet südaktsütsüla. Osang tajung khen danga mangashidangba pur jenti lir nung kodashür asenokbo osangtajung angashijen angashia alitsü ? Kishi shibanga aliba tesem (closed door) ta jembiba ni mamanger. Osangtajungji kishi ajak lapokba sabiji lir. Anungji onok missioni shibanga aliba lima nung dang mission mapa inyaker.

Tamanger kümdaktsütsüba masü netsüing ka-ka kümdaktsütsüla. Anungji asenok tongtibang nükjidongji sentong (programme) masü saka nisungji asütsüla. Mission mapa inyaktsü atema *timtem* (risk) agitsüla. Na meketa alibaji masü saka Tsüngremji nai kodaka meteta ali? *Kechi arudir aruaka metsübu timtem agitsü nai kodaka mulunga ali ibaji tenyaba mapa nung tongtibangtiba*. Onoki alima tesem balala 27 nung mapa inyaker. Iba ministry tenzüker sangküm küm 20 abensatsü. Item mapang ajak nung Tsüngremi kodanga anünga meyutsü. Onokiang agütsüsüsa Tsüngremi jenti moatsü. *Tsüngrem nem anidaktsüra iba sülen nüngdakba ajak arutsü. Tenyaba mapa ya aseni kechi inyaktettsü aser kwika agütsütettsü ta masü saka kong Tsüngremi pa mapa inyaktsüner, iba tesem nung Tebu shibai mulungbena agütsür pa tama anioktsüla*. Tsüngremer mapa jungkai adokba nai ajangshitsüla. Arogo ya kanga dang tobur tajung. Saka yangi asenok sentepba mener alitsüba masü, saka alima aser nisungtem dangi aotsüla. Teimla kodanga tesama. Tsüngremi tobur tamajung kaji tobur tajung ka kümdaktsütsü koka lir. Tamang, teimla aser temeim talubosa asen dak akatsüla.

Onük:- Temulungjang aser Shisatsü Meyipba Taküm

Mapang ajak nung lanurtemi Tsüngrem tenzüka angu dang ni Tsüngrem tenzüktsü tali jangradaktsür. Tanü lanurtem dak asenoki temulung kodaka agütsür patakaji asüng mission mapa inyaktettsü. Arogoi lanurtem nem mission mapa atema teti tesayuba agüjang. Naga lima nung aliba arogotem talisa Ao arogotemi ayongayonga malitsüla. Nenok Tsüngremi shimtetba kin. Nenok alima metsü. Nenok alima tesangwa. Yimlibilema oang aser samaba tanela kümzükang.

Tamangji kechi? Tongmelang agi, mapa tasak inyaktsü mulungtetba, timtemtsü

mulungtetba dang tongmelang agi 'tamang' ta ajatsü akok. Mosa-I pei dak tamang tulu maliasü. Saka pai Tulusang Tsüngremdak tamang ayu. Asenoki Tsüngrem kodaka metet iba yariji dang asen tamang alitsü. Kodang Tsüngrem nem anidaktsüdir kechisarena bendenloktsütsü.

Teimlaji kechi ? Melenshidaktsüba tashi Yisu Khristai asenok nem agütsü. Tsüngremji Teimla Tsüngrem. Alima melenshidaktsütsü Teimla Tashi asenok dak teti alitsüla. Teimla makaba taküm ka tatishitsüji ni lir. Ni tajung inyaktettsü kinungertemi meyimla. Ni melenshitsü tembartemi meyimla. Küdak teimla maliasü. Ni nisung tamajung ka liasü. Saka kütsüi teimla kodanga mesama. Ni melenshidaktsütsü tasa aika lai inyak. Ni kodanga mamaba kaji kaket tilala nung lai tekong zülur kü tsüngsem, kaket, table, yipten, pillow item ajak nung yutsü. Kü taküm liyonga aodang Tsüngremi kü den jembitsü tenzük aser ni melenshi. *Teimla ajanga kechisarena melenshitsü akoker.* Tangar dang Khrista temeim ashitsü asoshi tsüraburtemi pei chir teti ajongshitsüla.

Temeimji kechi ? Yisui sayatenya inyakbatem noklang shilem nung 60bo nisungtem aria bilemba agi inyak. Tsüngremi asenok meimtsü atema yanglu. Arogoi nüburtem meimtsüla. Temeim, Tamang aser Teimla arogo dak sobua alitsüla. Tsüngrem nem bendanga agütsüba nütsüngtem arogoi amshitsüla. Asenok ajak temulungjang nung missionary kaka kümdi.

Onük:- Libaliro Tasen

Yangi nenok Tsüngrem dak amangtsü aser Pa mapa inyaktsü tenokdangba kecha mali. Anungji nenok angudang kü medemer ka bilemteter. Pa onok külemi inyaker aser tangar dang Yisu temeim indang ashiba agi tepuokdak küm 5 ayu.

Pa tenüng Allan. Pa tanur ka tebu lir. Tepuokdak inyaker tulurtemi tebuttsü ita nung khi minute 15 arua ajuruteptsü mela. Sen makaba ajanga jabaso schooli moteti anen. Tzü aser light bill magütsütetba ajanga Govt-i itemji anendaktsü. Pa tepuokdak alidang item osang ajak angashi. Allan aser par kibongi timtem tulu ajuru. Anungji pai Tsüngrem dang 'Ne sentong kechi ?' ta asüngdang aser Pa nungi telangzüba ata-a ali.

Künep tantsür ka Allan tebuttsü bushia aru. "Yasüng pungmang nung ner atsüki nung plum aika danga angu. Ni plumji aika ne dang nungi alizük". Ni plum aika nüngdaker anungji aji alitsü na bushia arur. Nai sen kwika meshidir ni agütsütsü na shisa tebulu". Allan kinungtsü kanga aoksa. Kodang tantsüla tena atsüki jagi ao plum aika tanga aliba ngu. Plum ayokba sen jagi tanur school fee, tzü aser light bill kibong nüngdak ajak periatok.

Allani külemi tepuokdak alirtem aika temulung meyipdaksü anungji Govt-i pa taküm tepiyong tepuokdak ayu. Masü tashi tepuokdak mission mapa inyaktsü Tsüngremi pa aja. Ne taküm koda alir ? *Khristan tetzü anogo shia Tsüngrem den sentaktepa aliba.* Taküm ya

timtem agi sünga lir. Timtem mapang nunga Tsüngrem den sentaktepa alitsüla.

Onük:- Mulungsentsü Tasen. –Rev. G. Khing

Ni 1976 küm Lanur Camp ka nung temulung meyip. Kodang ni 1982 nung class X nung takok angu Theology azüngtsü ni telemtetba agi. Theology azüngtsü apusoa aodang ozü arogoi kü nem sen 1000 agütsü. Ni theology azüngba mapang timtem aika ajuru. Sapon (soap) alitsü sen maliba ajanga medemertemi agimar tilala entoka aliba shiten senzü.

Aonung ka pungmang nung Tsüngremi kü nem sen 400 agütsü. Iba anepdangji money order ajanga sen 400 Hindu nunger postman kati bener aru. Tsüngremi kü nüngdak ajak peridaktsü. Ni theology renemer külen Kohima nung Tsüngrem mapa inyaktsü tenzük. Ni gari makaba ajanga tetsüng agi dang senzüa tenzükba mapa inyak. Kenü anogo medemer, Buddhist yimsü amangertem parnok 7 Kohima reprangtsü Japan nungi aru. Ni gari makaba ngua parnoki kü nem gari ka alia agütsü. Tsüngremji onsara tulu aser Pa sentsüwangshi asoshi Pai mashi-i nisung kata amshitsü akok.

Aortemi tamasa Osang Tajung agizük. Nagaland nung asentenshi ka asoshi Aortemi tamasa sarasadema ayongzük. Aor lenisüba nung “Naga Lima Khrista asoshi” ta sangtong aser missionary 10,000 yoktsü Tsüngrem den tezüngzüktepba agi.

Yihusua 10:12-14: Yihusuai anir Israel nungertemi Amor nunger den rara. Iba anogo nung Yihusuai Tsüngrem den jembiba ama Israel nungertemi Amor nunger dak mang mayang tashi anü-i marakzü-i noktak aser ita-i ata. Yamaji Aortemi anir temenen den kodang raradir, Tsüngremi yaritsü aser tongpang akoktsü.

- T. Mapa 3:6-7: Peter-i ashi, “Ni taribi aser hon maka, saka ni kechi aka aji ni ne nem agütsüdi; Nazaret nunger Yisu Khrista tenüng nung jaja-ang” Aortemi anir asenok akaba tekümtet, asenoki meteta aliba Yisu temeim aser Pa taküm aliba item indang tangar dang shira Tsüngremi yaritsü. Alima kin aika dang nungi Naga lima ya tobur tajungba. Mepong tajung, rüjep mali, tzümetsüng marur, yipru tesashi marur, menoknok tesashi marur. Naga kin ajak nenok Aori moajang. Tsüngremi asen nübür ajungkettsü.

Onük:- Mulungsentsü Tasen. - Rev. Phurpu Lhomi

Ni Buddhist yimsü amangba kibong nung aso. Onok sobaliba aser yimsü nung kibong nung tambusangji monastery nung oa alir. Anungji ni Buddhist Monastery nung küm ana tashi Buddhist Monk inyak. Ni monastery nungi aru dangbo kütsü aser



kübo pala-a toker liasü. Foreigner kar anir Himalaya tenem tsüng nung senzü dang parnoki kü dang Tsüngrem O ashi. Idangji Tsüngremi kü den jembi aser ni Khristaji kü Kibur ta agizük. Iba anogo nungi tenzüka ni Khrista den jajar aser Pa tenzüker.

Kodang nisung ka Taküm Tasen kümdir-

- a. Pa tenarong tasen akümtsü aser yakta ngangshitsü
- b. Pa tebang tasen akümtsü aser temenen yakta nangzüknütsü
- c. Pa teka tasen akümtsü aser tangar yarinütsü
- d. Pa tetsüng tasen akümtsü aser tanela nung jajatsü
- e. *Pa molungsentsü Tasen* akümtsü aser Tsüngremi ashiba angatsü.

Mission ajanga Yisu nütsüng renlokdahtsütsüla- Mathi 28:19-20. Khristian mission ita, anogo aser küm masü saka asen taküm-i anogo shia mission inyakttsüla. Pauli ashi, “Kechiyong tanguba agi masü, saka tamang ajanga onoki jajar” 2 Korint 5:7. *Mission ya asen taküm, kibong aser asen arogo nungi tenzüksüla*. Tsüngremi missionary taküm aser arogo bushir. Missionary taküm kati agütsütsü, sarasademtsü aser aotsü akok.

Kodaser mission mapa takok ngua inyaktettsü ?

1. Tangar den yaritepa inyaksü akok (Partnership). Mother Teresai ashi, “Ni kechi meinyakteter nai inyaktettsü. Nai kechi meinyakteter ni inyaktettsü. Saka külemibo mapa tulu inyaktettsü”
- 2 Tsüngremi kechi angur aji nai anguba dang mang dang ta ajatsü akok.(Habakuk 2:2)



Nai anguba mission mangdang tangar den lemsatepba ajanga mission mapa nungtakok angutsü. 'Ne Mangdang+Kü Mangdang=Asenok Mangdang.

Rev. Peter Xu:

Tsüngremi Naga kin ajungkettsü aser Yisu asoshi temeranger sepai jenti adokdahtsütsü. Ni alima kin balala tesem aika süma senzüogo. Saka kin ajungai Yisu dak amangba kin ka nenok Naga kin amai kongamangu. Tsüngremi alima kin aika asoshi nenok tesangwa ka südahtsünür. American missionarytem-i Naga nunger ya Chinese nunger ta bilema osang tajung sangoktsü. Nenoki iba temoatsü agiogo. Saka tanü tashi nenoki China lima osangtajung agi metongteti lir.



looking after Mrs Paul, a ministry
of love and care

- 1958 küm China lima nung arogo shibangtsü
- 1964 küm China town arogothem shibangtsü
- 1967 küm tatembangsa arogo ana alibashibangtsü.

Mao Tse Tung tebutsi yamai ashi, 'Tsüngrem oadokang. China lima nung Khristan yimsüji otsü ka dang kümogo' (Let God get out. Christianity in China is in the museum of history). Saka kechiaia Khristan yimsü menokdangtet. Ya mesuem nunga rizünga mayu. Mao Tse Tung tebutsi la sasa suseta asü. Tesüiba küm 70 tsüngda China nung Tsüngremi arogo jenti adokdaksü. Communist yimsüsüba nungi tanübo Khristan yongzük teimtiba alibaji China kümogo.

China lima kechiba Tsüngremi asentenshitsür? Pa O ataloktsü atema (cf. Isa 24:15; Eze 43:2-5) 'Anüdoklen' ta lai nung shia alibaji China aser Naga kin anüdoklen aliba kin lir. Asenok mapa jenti lir. Tsüngremer shin o ataloktsüsa kangki apur pa sülen anidakdi.



Mrs. Paul anebalutsü Charemnaro
atema maongka liasu



*"Mission mapa inyaktettsü tashi
tulutibaji sarasadem"*

—A. B. Simpson

TANÜ TENSA TENYABA: TANGATETBA TASEN (MISSION TODAY: A NEW MINDSET)

—✦✦✦✦✦—
Temjenmongba Sempo
Pastor
—✦✦✦✦✦—



Okila

“Mission” “tenyaba” ta asüba ya Latin O “missioninimus” nungi lir, koba tetezü “tenyaba mapa asoshi yokba” (act of sending). Kechi atema tenya ta süra; Khristai temenen nungi alangzükba, tekümtet aser yimjung agütsüba alima dangi bener aoba tenyaba mapa, ta angateter. Aji oda asen Tsüngremji missionary Tsüngrem ta asenok ajaki meteta lir. Missionji Pai meimba mapa ka dang masü, saka Pa dak aketba jakla, pa nungi adokba aser Pa mulungsentsü. Kümzüka aliba tamanger ajak, iba tenyaba mapa nungi jenbutsü makok, kechiyong süra tamanger ka ta asübaji missionary ka ta angatetsü teim. Tamanger ka asoshi tenüng tanga kaji missionary lir. Tsüngrem aser mission mapa bendangtsü makokba ama tamanger aser missionji bendangtsü makok. Adam aser Eve-i temenen menaba anogo nungi iba mission mapa tenzük aser Khrista maru tashi iba mapa maneni alitsü. Anungjiajaki, oda, tamangertemi - asen tensa den apet tangatetba tasen nung iba mission mapa tajungtiba nung koma inyaktsü, ta asüngdanga, nükjidongji tajung yur alitsüla. Mission mapa tajungtiba nung inyaktsü asoshi leman aika lir aser itemrong nungi, ni kanga tongtipang ta angatetba ka asenok den lemsateper.

I. Tanü tensa mission tajaba rong nung ka

1300-1720AD nung Robert deNobili, Francis Xavier, Raymond Lull, Peter Claver; 1800AD nung Wiliam Carey, Adoniram Judson, Alexander Duff ama ajanga alima dangi Tsüngrem osang abenba angur. 19th Century tatembang len nungibo mission mapa ya Arogo kisüngi dang masü saka talisa 20th century nungi tenzüka para-churches, theological institutions aser ano *Student Volunteer Movement, Inter-Varsity Fellowship* ama tamanger telongjem tentet ajanga mission mapa takok ngua inyaka aruba angur. Joko 20th Century nungibo Arogo, kija mesüra lokti ka ajanga masü saka tamanger ajak longjemer kati ka yaritepa inyaktsü tenzükba angur (networking); iba tangatetba nungi adokbaji, tatishitsü agi, *International Missionary Council nungi World Council of Churches tentetba* ama angur. Anungji tanü mission mapa akhi dang nungi balaka nung inyaker. Globalization, media aser information technology ajanga mission mapa asen kikümbang tonga bener aruogo. Tanü

alima talangi moaka mission mapa inyaksü koka lir. Arogo lokti tentet balala den tesendaktep nung inyaksü koka lir. Aji oda, iba mapa nung Ao Arogotemi kanga junga alima tesem balala nung mission mapa inyakba angudang Tsüngrem tenüng asanger. Mission tajaba aika lir aser koma inyaksü iba tangatetba shisatsü lemang aika lir; iba indang ni melemsar, saka mission tajaba rongnung ka indang jembinür, ibaji *home mission* lir. Arogo nung tanela mesüba mapa aser pei lushi telongtet nung tanela kümzükba mapa inyakba dang *home mission* ta ajatsü akok. Tanü 21st century nung iba tajaba wadang nung amendaker mission wadang ajak tashi ita inyakba angur, anungji iba mission wadang ya kanga tongtipang.

II. Arogo aser *home mission* tenyaba mapa

Yisui Arogo tenteta metoktsü mesüra tenzükang ta mashi saka kongsa tamangertem jatet idakji parnok külemi sentep. Mezüng tamangertem synagogue nung sentepa liasü, saka parnok senteptsü memela nung parnok tesem balala nung sentep aser iba ya arogo tenzükbaji liasü. Pauli anir maneni arogo balala tenzuka tanishir shima toktsü; aji oda mission takok anguba noksa kaji arogo tentetba ya ka liasü; tetezü mission süngjangji arogo. Ano maneni arogo kobatamanger telongjem lir iba ya mission atema aliba angur. Anungji arogo nükjidingji mission, arogoji mission, aser Tsüngremi Pa mission atema amshiba hatir (tool) ta angatettsü teim. Iba nung *home mission* koba pei lushi telongtet nung tanela kümzükba aser Tsüngrem osang sangdongba mapa lir, iba ya kanga tongtipang. Iba indang tekuboklen tatsüka lemsateper.

I. Arogo nung tanela mesüba *home mission* mapa

Arogoji mission asü nung osangtajung abentsü asoshi arogo tashi tait asütsü teim. Arogo tashi meitra koda mission mapa inyaksü? Alima otsü reprangra tanü tekülemdak aika museum, entertainment centres aser tanga tamangba tekülemdak ki küma lir. Arogo nung tanela mesüba mapa meinyakra iba jenjang jagi atongtsü. *Tamanger melira arogo mali*. Tanü, ken mapang tamanger lima aliba ano maneni Tsüngrem osang tajung nüngdakba angur. Anungji iba tanela mesüba maneni arogo nung alitsüla; mission mapa kodanga matemer. International Missionary Council 1910, Edinburg, nung alidang - Arogoi tanela mesüba mapa nung ano tali tashi aitsüla aser tamangertem Tsüngrem O tesayuba nung tera yangdaktsütsüla ta lemsatep. Kesa senden 1947 Whitby nung alidang "*evangelism within the Church*" ya mission wadang tulu ta angatet. Aji oda iba tenyaba mapa meinyakra Arogo asoshi sentsü tulu lir.

Tanurtem aser lanurtema teimba tanela nung kinü aser ano tanaben asotsü nüngdakba takümtem lir; anungji tanur aser lanurtem den Tsüngrem osang tajung

lemsateptsüba ya Arogo asoshi tenyaba mapa tulutiba rongnung ka lir. Iba wadang meranga inyakra künü item lanurtemi Arogo anitsü aser Tsüngremer mission mapa maneni inyaksü. Ano tenüng agi tamanger süaka Khrista makaba nübur aika lir anungji item dangi tekümtet osang abentsü tenyaba mapa inyakba ajanga Tsüngrem sentsüwangshidaksür. Item wadang melira home mission tasü aser tasü Arogo kati mission mapa kecha inyaksü makok. Anungji iba mapa nung mapang aser rongsen agütsütsü nüngdaker.

ii. Arogo aliba telongtet tesem nung mission mapa

Globalization ajanga alima nung aliba nüburtem anasa anir aruba ajanga mission asen kikümbang tonga bener aruogo. Talisa Naga lima nung asen kidanger aser kiyongertem rongnung mamanger aika lir aser parnok dangi Tsüngrem osang abentsü tasak masü. Asen lushi nung tanelar wadang meranga inyakba, Arogo kati ka yaritepa tanela mesüba mapa inyakba; item ajak ya *home mission* lir. Tatishitsü agi asen Naga lima nung dang masü saka India lima tesem balala nung inyakba ajak ya *home mission* ta ajatsü koka lir. Tanga State nung dang masü saka tanü-a asen Naga nungertem rongnung mamangba kintem lir. Anungji iba mission wadang ya tulu ka aser kanga tongtipang. Tourism ajanga aruba, shishilembaba ajanga tesendaktep yangluba item ajak ya asen kikümbang tonga bener aruba mission maongka lir. Arogo aikati iba home mission meranga inyakdagi saka ano tali temulung agüja inyak nung ajungtsü.

iii. Lokti ochi nung melenshiba ajanga Khrista kuli asüba *home mission*

International Missionary Council 1947, Witby, nung alidang -*The task of the church is evangelization "of every area of life"* ta angateta lemsatep. Tamanger ka ama, sensaker aser nüngdaka aliba pur yaritsü asoshi aser ochi asoshi nokdakba loktitem nungittsü, ibaya tamanger ka asoshi mission mapa; iba ya ajanga Khristai bener aruba tesünep aser tanela tanebtsüba alima dangi bener aor ta maneni lemsatep. 2001 küm evangelical agencies tem Oxford nung ajurutep aser *Micah Network* tentet. Parnoki "*integral mission*" ta asüba tangatetba bener aru aser iba nung missionji tenük telen balala aliba ama lokti dangi tesünep bener aobaji-a shilem ka lir ta lemsatep. Iba ya mission renlokba ya tangatetba tasen liasü aser tanü iba tangatetba Arogotemdak lira Tsüngremer mission mapa tajungba nung inyaksü koka lir. Tezülur kari iba dang "*transformational mission*" ta ajar.

Tezülur Bragg Wayne-i züluba kaket "*the church in response to human need*" nung yamai ashir "...*transformation is the change from a condition of human existence contrary to God's purpose to one in which people are able to enjoy fullness of life in harmony with God*". Yisu Khristaji yimjung chuba, teyarir, teti tatem maka tebu ta Isaia kaket nung shia aliba angur. Anungji Tsüngremi mulungba koba ochi, yimchi yimjung aser tesünep lir iba ya

alima lokti dangi abentsü aser ibakuli asüba ya Arogo asoshi Tsüngremer mission lir. Meimchir aser pa aliba lokti asoshi Tsüngremer sentong tajung kechi lir iba mapa jungkai adokdaksübaji mission lir. Iba mapa ya Arogo kipok nungi tenzüksüla. Arogo asoshi iba ya *home mission* tongtipang ka lir. Iba mission mapa asoshi tatishitsü kar yamai lemsar:

- a. *Sensaker mesüra mapa maliba nübur asoshi leman bushia parnok skill oriented training agütsütsü akok.*
- b. *Government den tongtepratepa sensakba tia endoktsü ajungshitsüla. (Advocate with government in eradicating poverty)*
- c. *Pei temeten aser kechi shitak, koba government temzüng ajanga agüja lir, iba indang tangatetba agütsüba aser iba nung shilem agiba. (empowering people in knowing their rights and educating people on government schemes and policies for their welfare)*
- d. *Ochimashi (corruption) yanglushiba nung shilem agiba.*
- e. *Nemzüka toktsüba nübur aser nüngdakba nübur tia yanglushiba nung shilem agiba.*
- f. *Lokti tsüngda mangatettep nung yimjung yanglutsür asütsüla.*
- g. *Tsüngremi yangluba lima wazüka ayuba nung shilem agitsüla (environmental concern).*

Item ajak inyakba ajanga Khrista yimli nüburtem rongnung jungkai adokdaksür aser ibaji Tsüngremer mission lir. *Amos 5:23-24 Nenoki kü dang nungi nenok ken ola bener oang; kechiyong nenok kongki ola ni mangatsü. Saka tzü ma ochiba nunga aludakjang, aser temeshiba moshia yimdakjang*” Alima dangi ochi aser temeshiba bener aotsüji Arogo nem agütsüba mission. Tanü tensa iba mission wadang ya angatetra Tsüngrem yimli lokti aser alima nung jungkai adoktsü. Ibaya Tsüngremi mulungba mission mapa lir.

Otembang-

Arogo nung mission ya tenük telen ka masü saka rangbenji mission lir. Tsüngremer mission sendong asoshi Arogo jatet. Tamanger shia missionary ka ka aser tamanger telongjem koba dang Arogo ta ajar ibaji missionary. Iba jatetba mission mapa inyaktsü asoshi alu aika lir aser lemsatepba ama *home mission* ya alu ka lir. Iba *home mission* ya kanga tongtipang, kechiyong süra pei alu wadang takok anguba ajanga dang tanga alu mapa junga inyaktsü akoker. Iba alu ya Khrista osang, koba tamangertemi bener aor, iba noksaji lir. Iba alu nung tsünütetba süngjang ajanga dang mesütsü aser proktsü akoker. Arogo nung tanela terayanga mesüba, lushi telongtet nung tanela anir aruba aser kümzükbä, lushi nung Khrista yimli yangerdaktsüba item ajak ya home mission ta angateter. Anungji asen Arogotemi iba home mission nung meranga inyaktsü aser ibai ajanga tanga mission wadang tajungtiba nung inyaktsü nükla yudi ta lemsateper.

UZBEKISTAN NUNGI OSANG

David, Achi aser Shisaben (Wallings)

Temiem adianutem,

Nenok ajak junga alitsü yimla-a iba shiti ya zülur. Nisung ka taküm nung lokdi aser kintem rongnung sarasadem tashi agi temelenshi tulu adokdaksütsü ta onoki amanger. 1Thess 1: 2-10.

Tesüiba mapang nisung aika den ajurutepa lemsateptsü mapang tajung aika ajuruogo. Ibaji onok ajungba agi masü saka Kibuba-i leman lapokja idaki alima nübурtem taküm nung kongshidaktsü. Ozü-i arogo ana, ka Silver Jubilee amongba aser kaji aluruba benjongmong aliba arogo ajuru-a liasü. Ana rongnungji arogo kati lanurtem atema 'Team Building' aser 'Time Management' sentong ka akatsü Achila dang asüngdanga liasü. Iba sentong nung nisung 31 tena liasü. Parnoki tanübo tanga sentongtema agijang ta jaoka lir. Iba maongka asoshi Kibuba tenüng asanger.

Nenoki sarasademtsüba aser ajungshi-a nungitba atema kanga pelar. Kibuba-i ozü asoshi leman balala lapoktsüdang kanga süngmanger. Ita ana tsüngda nung ozü-i company 10 (ter) ten ajurutepogo aser parnok rongnung company pungo-ibo (5) onoki agütsüba training agitsü mulunga nangzükogo. Ozü wadang ajanga onoki nisungtem aika ajurur aser ibaji ajanga idaki aliba nübурtem moatsütsü aser onok den inyakertem yaritettsü imlar. Tang tashibo onok yangi alitsü asoshi temelaba ngua lir. Yimlibilima ozü wadang maneni inyaka otettsü asoshi sarasademjangma.

Hopta ana tejaklen mezüngbuba anogo tesadang seminar ka agia liasü. English jembirtem nisung ti (8) atentsü onoki sarasadem-a liasü aser parnok ti prongla arua atenba asoshi Tsüngrem tenüng asanger.



Pastor ka den Bible Study fellowship indang lemsateptsü mapang tajung angu. Idagi nüburtem-i Khristan kaket mesüra iba indang par oshi nung züluba kecha amshitsü makoker. Anungji parnoki itemji kodaser angutsü ta onoki leman balala bushidaki. Onoki Lipok kaket nungi lenirtem asoshi lesson meyipzükogo, aser tang Mathi kaket nungi inyakba mapang lir. Korea nunger adianu ka den bible study fellowship indangji onoki lemsatepa liasü aser onoki yangluba lessontemji amshia pa-a telok balala den Tsüngrem mapainyaksü pelaseta lir.

Onok den külemi küm tekü (9) tenzüka aliba South African nunger tantsür tambur apuanina South Korea nungi mungdang ka nung dener arudang kinungboji iba lima yagi aittsü temelaba magütsü-i South Korea-isa meyiba aotsü ozüng agütsü. Kinungtsüji-a joko meyipa aotsü asoshi khu renemdagi. Parnok asoshi sarasadem nung bilemtetjangma.

Maneni sarasademtsüba asoshi nenok dang kanga pelar. Ozü business license küm ka asoshi agütsüogo (till Sept. 2017) aser ita terok (6) atema visa nguogo (till Mar. 2017).

Ozü business contract ana nguogo – ka November nung aser ka December nung. Ibaji ajanga onok idagi alitsü yarir. Kibuba tenüng sangdi.

Item atema sarasademjangma:

- Kecha tenokdangba makai Bible study fellowship katettsü asoshi
- Kiyongertem den tesendaktep tajung katettsü asoshi
- November aser December nung business training asoshi
- Ozü wadang ajanga Khrista osang tajung lemsateptettsü asoshi
- Ni anir Sunday small group (tain 17, tanur 5) junga katettsü asoshi



2016 NAGA CHRISTIAN FELLOWSHIP DEHRADUN REPORT

—✧✧✧✧—
Meyikümzüük Ozüküm
Pastor, NCF Dehradun
—✧✧✧✧—



Khrista temeim salem nenok ajak dangi maneni abener. Küm süitema aodang Tsüngremi kanga meima ozü kibong küm tepiyong len ani nung tamasa Tsüngrem nem tenüngsang tulu agütsür.

Onok aliba tesem Uttarakhand State ya kangasa tanela tongpang sashia raradak tesem ka lir, kechiyong iba lima ya Hindu tekülem lipokdak aser tesem palala nung mojing yimsü züina aoba tesem ka lir. Asenok Khrista nung alirtemi Yirusalemi kenbo odangnüba amai, mesüra Islam tamanger nisung shia taküm nung kenbosa Mecca leni pilgrimage aoba amai, yangi Hindu nungertemi küm shia Uttarakhand tesem ya mesemi külem küja

asütsü senteper. India nunger dang masü saka foreigner aika alima tesem palala nungi pilgrimage mechi arua jabujarir meyipa aoba angu dang kangasa kü temulung nung tip matemer. Kusa mapang nung Khristantemi-a kanga meranga Tsüngrem temeim osang sangdonga tesem aika nung inyaktsü meranger. Saka aiben nüburtem mulungjang melapoker kechiyong mojingi nisungtem tenük pokdaktsür ali nung, sarasadem tashi dak alaka tanga kecha agia takok ngua tejang madanger.

Ken mapang ka yamai atalokba otsü ka lemsaner. South American nunger missionary ka Uttarakhand-i Tsüngrem mapa inyaktsü aru. Pai tamasa Dehradun-i arua senzütsü tenzük dang pai pei sasa kari ani nungdang pa mapaji temela asütsü ta ajitet. Pai Indian Driving license ka meshitsü nükjidong yur driving test tenzük. Pai par lima nungbo junga anir saka India nunger kari aniba yimya angazüktsü merang aser pai kanga junga driving testji tembang. Saka tatem nung, instructor jagi pa dang final question ka yamai asündang. “Nai kanga junga anir ta ajitetogo, saka tatishitsü agi kenü anogo nai kari anir leman nung aodang ajungbena *Brake Fail* sur nai kariji ken nungbo manentetsü sa aküm, aser nai control asütsü meranga aodang, nü jakdang nisung ka nü tachichi nung aser nashi ka nu tabelen ta ajuru. Sura nai iba mapang nungji shiba paidoker koba dak atsüktsü?”

Missionary pai yakta dang yamai langzü, “Nashi dak jiang atsüksü ati” ta sensaksemer class tembang.

Otsü tatsü agi yamai... Ita junga pai license mongutet kechiyong pai final tasüngdangba nung tamakok angu. Tanaben merangdang saka kasa khuli ajanga license mongutet. Missionariba-i kanga süngmanga sarasadem telok ka nung lemsatepdang, local tamanger kati yamai ashi, “nai ano ken merangang aser danbo yamai langzüang; nashi melen nisungba dak ang atsüksü ati ta shiang.” Atangji pai tasemben buba nung yamaji langzü aser tesüngmangtsüka pai panüjisa license agizüka bener kidang-i shilang.

Iba ya asaya menü otsü ka masü, saka Dehradun nung shitak atalokba otsü ka lir. Meimchir mulungjang nung Tsüngrem temeim mali nung mojingi yimsü asür, aser kodang nisung mulungjang shibanga tenük pokdaksüdir nüburtemi joko tajung aser tamajung na mependangteter. Temeten lenmang ang tai aser tai mesüra mapa tamajungang temeten ama benschir. Nisung taküm ka dang nungibo nashiang taoba ama, ano yimdong nung aliba azü (stray dogs) temi tanur kar nguseta mesüra nisung kar dak ngua yirutsü nung, ozüngi aija action magir, kechiyong aji yimya ka ama bilemer, saka kodang shiruru dak kongshidir, nisungtemi animal rights tenüng atemer tashiyim mapa inyaker.

Atangji yangi anogoshia tanela tongpang tulutibaji ibala shisatsü jakla bener Tsüngrem temeim mangateti alirtem den ajurua kuli asütsüba ya ka lir. NCF telok mapangshia outreach mapang nung kentena Tsüngrem o ajanga kuli asü dang aiben mamanger nisung aikati Yisu Khristaji Tsüngrem aser teküzmüksang ta tebang agibo nangzüker saka parnok teimba kati temenen nangzüker par tanga tsüngremtemji mesendokteter, kechiyong parnok tetsübu nung dang alir. Parnoki temenen ajak toktsür Khrista sülen jajatsü mememulunger aser yamaji tesasatsüka ochi lenmangi maruteter. Ibaia tia nung aliba ajanga asenoki Tsüngrem dang ochi lenmang asoshi parnok tanela tenük lapokdakjang ta bendanga sarasadem mesüra, sayutsüngia kuli süaka tongpang aiben takok menguteter.

Dehradun city, Mussorie aser Nainital ama tesem kar dak alaka tenem len tuagibo ano timba ka tesangwa agi metongsepba tesem aika lir. India lima nung küm shia Serampore aser ATA kübok Theological colleges tem ajanga students meyrjang aika züngteta graduate sür kelen Tsüngrem tenzüksü mapai ayaoker. Saka temulung shirangtsüka, teimba kati tesangwa alidaki dang oagi inyakner. Süraprang Tammang alidaki shirnoki Tesangwa bener aotsü? Aser talisa asen Naga nung theological graduatetemia tesangwa malidak tesem palalai milen bener aotsü mulunga lir mali? Ni kechiba yamai lemsar ta kari bilema lira, Dehradun nung ozü kibong dang masü saka ano tenem len tuagi Uttarakhand tesem palala nung Naga nung missionary kibong tenet tashi Tsüngrem mapa meranga inyakdar. Parnok rongnung kibong pungo tashibo asen aoer kibong lir. Parnok shinga theological graduate masü saka pei akokba yari Tsüngrem

temeim angateta tesangwa malidak milen kaka ama anogoshia mapa meranga inyaker. Tsüngrem O zünger meteta alirtemi mulungteta maodang parnoki tonga aruagi merangdar ta metetdaksünür.

Tsüngrem mapa nung tulu tila kecha bendanga mali aser asen tenzükba maongka ya Tsüngremer taochi tulu lir. Theology azünger dang Tsüngrem tenzüksü ta mali aser aji asenok ajaki junga angateta lir. Saka, nibo yamai bilemer, küm shia theological graduatetem ajakisa masü yonga timba kati tesangwa malidak tesem palalai aotsü graduate masü dang nungi sarasadema renema atar külen mapang tatsüka süaka talangka asüyonga oagi tenzük nungbo Tsüngremer yimli tali züintsü. Kechiyong asenoki tetenzük nungi Tsüngrem tenzüksü tejangraba aser tajaba tejangja yur Tsüngrem o azünger.

Hao! Wadang melarabo masü kechiyong tesangwa malidak tesem nung aiben sayutsüngitsü mesatempa den Tsüngrem osang peroka kuli süaka nüburtem temulung tenük shibanga aliba kanga melabo melapokteter. Onok yangi Dehradun yimti nung tamangertem atema sentep aser tekülem awashitsü tera tesatempa lir, saka Tzüsenba (Baptismal) service yabo kanga dang meima (secretly) agir. Takok tashi social networking sites aser newsletters tem nung noksa advertise masütsü kümdanger, kechiyong lendong kanga ana nung lir.

Küm memeteti dang anogo ka ama suia aodang yangi NCF ministry nung Tsüngremi temeim aser yimlibilem tulu ajanga asüama aser timtem mokoktetsüsa kecha majurudaksü nung Tsüngrem tenüng maneni asanger. Yaküm nungi tenzüka KABA Short Term Missionary Interns sentong ajanga lanur ana tashi yoka NCF ministry nung yaritepa ya kanga tejangzük lir ta shinür. Taküm-a Mr. Putinungsang Ozüküm onok den aruagi ministry nung arogopur tem kanga temoatsü ngua inyakdar ta kulisüner. Asen KABA arogo dang ya shinür: Nenoki maneni sarasadem ajanga nungit nung meshitetba tepela metetdaksür. Nenok sarasadem amajok masü aser nenok sarasadem tamang ajanga Tsüngremi mapa tulu inyakdaki. Ano maneni ozü kibong nung Tsüngremi temeim tulu sayua kübutsü Bethel kena nem jala Ochiben moatsü nung Tsüngrem tenüng tali asanger. Tsüngrem tenzükba mapa nung teti pa sentsüwangshidaksütsü tashi meshia sarasadem nung abentsü nenok ajak dang maneni mepishir.



NCF Dehradun weekly group Bible study

TESÜIBA ASER TARUTSÜ INDANG REPRANGBA

—❖❖❖❖❖—
Rongsenkala Jamir
Thailand
—❖❖❖❖❖—

Thailand nung küm tanabuba aliba indang: mapang koma aoar memeteti kanga junga aser temoatsü nung süogo. Ni asoshi mezüng kümbo kanga dang tasak liasü saka yangi alirtem temeim aser parnoki ni pei ama agizükba ajanga kecha timtem mali süidaktsüogo. Tsüngremi ni mapa ajak nung len anidang ni kanga temoatsüba ta pelar.

Oshi (language) : Wadang nung takok tajung angutsü asoshi shir den wadang inyaker par oshiji metettsü nüngdak talibasa par oshi nung laishiba zünga sarasademtsü nüngdaker. Nia yaküm dang nungibo takümang Thai oshi tajungba jembiteter. Ni parnok oshi angazüktsü kanga dang nüngdak ta angatetebaji mapang ka hostel nung tetsür chanu ka la kija jepa alidang ni la den jembi saka lai Thai oshi agi langzü anungji la mulung süngzüktsü ni kecha mishitet.

Saka tanü ni ya metetta aru – ministry nung oshiji masü saka temeimjiang tongtibangba. Kechiyong temiem meteni tanela mapa kecha meinyaktettsü.

Kathy's Home: Tesüiba küm oshi mashiba agi tanurtemden mejembitet. Saka dangbo aji melenshiogo. Parnok teyi nunger ka ama hostel nung studentstem ni yariteter.

Ni azünga alidang parnok jatener English jembitsü aser sayisabong sayur. Ken tentepba ajanga parnok den ni anasaba akümer.

School: Ni mezüngbuba küm school nung inyakbaji jangratemtsüka liasü. Kü mapa nung timtembo aika ajuru saka Tsüngremi Pa sendong atalokdaktsütsü



asoshi maneni ni amshir. Studentstemi pelashishia English angazüksü jangraba agi ni pelar. Item tila tanurtem ajanga Tsüngremi ni moatsür aser tangazükba-a angur.

Bible Camp: Taküm-a ni mezüng inyakba mission field Mae Sariang semdanga liasü. Idakji bible camp ka “One ticket to Heaven” omen nung liasü aser idakji nia ken O jembi.



Ajakden tesendaktep akaba: Medemer aika yimteta tesendaktep tajung ayutsü Tsüngremi moaja aruogo. Tesayurtem aser tsüraburtemden English jembitsü angazükteper. Item tesayurtem Khrista dangi anir arutsü ni asoshi sarasademjangma.

A Whole new World: Nagaland-i meyipa arudang ni asoshi kanga dang balaka liasü. Ozü kibong aser medemertem den pelatepa mapang indok aser arogo den tesendaktep (reconnecting) yanglushia liasü.

Sarasadem:

- “Sarasadem nung akang akanga maneni liang, aser idakji tenüngsang agütsüba den saksalema liang. Aser Tsüngremi Pa O asoshi nenok nem lapoktsütettsü asoshi Khrista miim O, koba asoshi nia talenba nung lir.” Kolosi 4: 2-3
- “Aser iba nung maneni merangba aser temepishiba ajak nung temeshipur ajak asoshi aser ni asoshi saksalema sarasademang” Efesa 6:19
- “...aser meshisadangba aser tamajung nisung nungi nenok kümzüktettsüsa, kechiaser ajakibo mamang, item atema sarasadenjang.” 2Tessalonika 3:2



MUMBAI NUNGI NAGA CHRISTIAN FELLOWSHIP OSANG

—✧✧✧—
Sakurepba Tzüdir
—✧✧✧—

Mumbai Naga Christian Fellowship nungi salem abener.

Kümshia tebilemtsü khuret bener arutsür saka idangji tepela tuluba aser masadantetba asen Kibuba Tsüngrem temeim ajurur. Taküm ya Mumbai NCF asoshi kanga tongtibang mapang ka liasu. Onok fellowship nung revival adokdakjang ta küm tenet sarasadema aru aser aji onok züngsem kar rongnung adoka liasü. Kibubai nüburttem mulungjang nung kongshiba asoshi onoki Pa tenüng asanger. Iba küm ya tejak o tejak jitepa tanela tongpang raraba küm ka liasü. Lanurtem aika moiijing talenba agi alena alirtem den tanüla mapa inyakba ajangashia arudagi. Saka tongpang ajak nung Tsüngremi onok nem takok agütsür. Moiijing mapaji Tanela Temeshi mapa ama atangji nung lir saka Tanela Temeshi ainji moiijingi nokdangtsü makok. Onok küm tatem camp BEAT 5312 ji tanela asentenshiba mapang ka liasü. KABA Youth Director-i anir lanurtem arua onok den atenbaji onok asoshi talila temoatsü ka liasü. Campers 70 tashi tena liasu aser ibai NCF Mumbai otsü nung telok timtiba atenbaji liasu. Iba camp nungi shinga tanela temoatsü mongui mao ta onoki amanger. Parnok aikati Tsüngrem den tesentaktep yanglushi aser karbo mezüngbuba Khrista ajuruba mapang ka liasü. Tsüngremi onok fellowship nung tesüngmangtsü mapatem inyakba atema Pa tenüng asanger.



Tetushi aser tekülem agibaji onok fellowship nung tanela ajungmesoba mapa ka lir. Saka tetushi aser tekülemji noktaker tenüngsang ken atenbaji dangbo masü ta meteta arur. Joko onoki mapang tatsüka tetushi aser tekülem magi-i chichiba nung Tsüngrem külbumbaji kechi aji angatetdaksütsü meranger. Tetenzük nungbo onoki tera atidaka bilem kechiyong lanurtem asoshi tetüshi aser tekülüm meteni sentep agibaji tesüleni atsünga lur asentenshi-a tenzükshir mesüka lir.

Onoki tesüiba kümtem nung mangateti alibatem angatetdaksüba asoshi Kibuba tenüng asanger. Temalen ashibatem denji sarasadem onük kar lemsatepnür. Ozü lanurtem-i atangjiba Yisu nütsüng ka ama litettsü asoshi sarasademjang. Iba yimti tulu nung studentstem süaka, mapa inyakertem süaka parnok alidak Khristan taküm litettsü sarasademjangma. Mumbai NCF-i iba yimti nung aliba nüburttem asoshi nüngdakbatem peria inyaktettsü asoshi-a sarasademjangma. Onok küm tepiyong Tsüngremi kümzükba asoshi Pa tenüng sangdi. Asen arogo aser nüburttem-i Mumbai NCF leman balala nung maneni yariba asoshi pelaba ajak den lemsateper, aser asen arogo den teti tongtepratepja aliba asoshi KABA Mission department dang-a tepela tulu shioker.



NCF Mumbai camp 2016 KABA-i sponsor asu

KATHY'S HOME THAILAND NUNG MISSION MAPA INYAKBA OSANG

—✦✦✦—
Bendangaküm
—✦✦✦—

Kathy's Home, Thailand, nungi Rev Arenla, pastortem, Mission Board membortem aser KABA membortem dangi salem abener. Yisu tesünep nenok den teti liangma. Nenok dangi anosa Tsüngremi kü nem moatsüba wadang indang zülutsüsa mapang moatsüba asoshi Pa tenüng asanger. Moijinger sang nungi Tsüngremi ni kümzüka aru kechiba sura asen Tsüngremji ochishir lir. Ni teti 1Yohan 4:4 bilemteter – “....kechiaser alima nung aliba dak nungi nenok dak alibaji tuluba.”



Ni kodanga hostel nung melidang anungji Kathy's Home nung aliba ajanga ni tangazükba aika angur; hostel nung alitsüya kangabo temela masü! Saka ni amanger iba experience ajanga ni tajangzük angutsü. Tanur azüoktsü (disciplining) kangabo temela masü saka item tesayuba ajanga tarutsü nung parnok ajangzüktsü ta angateta ni teimla yua inyaker.

Kathy's Home nung aliba tanurtem ajak Laos den artsü süa aliba yimtsüng nungi lir. Tanurtem-i tashi mangaba mapatem inyakaka, ni kodang parnok sobaliba aser tsürabur-i koda intetdaksü iba indang bilemdir ni parnok aitsütsü makok, kechiba süra tim masüba mapatem tanurtemi tsürabur nungi angazükba lir. Mapang ka nung ni Okola Maken Sanglir den student ka indang kinunger tasüdaki oa liasü. Iba student tebu-i Okola Makenba nguaka arua mejembi. Ni kanga aoksa kechiba süra Sanglir kibongi parnok taküm piyong Hmong nung tanurtem pei tanur ama reprang aser tajung kümdaktsünü.

Ni mentoring aser counselling nung kanga janrar anungji mapang angudang ni tanurtem den o lemtepba nung mapang endoker. Iba mapang nung tanurtem-i parnok tejangraba, teimla aser mangdang indang aser tenokdangbatem lemsateper. Thailand nung Hmong nung ya Thai nungeri mezüngshir aser parnok dang nungi teküpokba ta benschir. Iba mapangya ni asoshi kanga mapang tajung ta züngshir aser item tanurtem dang temulung ulutsü, tasü ita alitsü aser Yisu-i len anira ajak takoktsü lir ta tesayuba agütsür. Item tanurtem tia angudang ni Delhi nung engineering azüngba aser mapa inyakba mapang

nung idakji aliba nisungtemi ni mezügmeshiba bilemteter aser ni kü takümji parnok taküm den medemdangteter. Education aser sempet balala nung Hmong tanurtem-a tangerden toktepteta lir.

Tatem nung KABA teyari aser sarasadem asoshi kanga pelaba metetdaksür. Maneni nenok sarasadem kü wadang asoshi aginür.



NAGA CHRISTIAN FELLOWSHIP MYSORE 2016 OSANG

Toshi Jamir



Naga Christian Fellowship, Mysore nungi arogo purtem ajak dangi Yisu Khrriista tenüng nung salem metetdaksür.

2016 küm ya khuli süba mapa nung Tsüngrem tamang katetba tali jangja-a metetba küm ka liasü. 2 Korint 3:17 nung aliba ama “NUCHISO” omen nung ajemdaker February ita nung anogo 4 atema Annual Camp sentong ka liasü. Iba sentong nung tongti o jembirtem Mr.Zajamo Odyuo, Pastor NCF Hyderabad

aser Mr. Lindley, Bangalore liasü. Iba sentong nung lanurtem 54 aten. Iba camp mapang Tsüngremi semdanga lanurtem aika tanela temoatsü angu.

Ita shia mezüngbuba deobar anogo lumia sarasademba sentong agia arur. Iba sentong nung sarasademba dak alaka lanurtemi taküm khuli agütsüba ajanga ita shia temoatsü balala anguba mapang liasü. Iba sentong ya NCF Mysore asoshi tongshi lir.

Mizo Welfare Mysore den telongjem sentep litettsüsa Tsüngremi lenmang lapoktsü. Pei pi kidang nungi talangka pilar liaka kodangsa North East nüburtem telongjem akar, idangji adianu/kinungertem ajuruteper ama bilemer aser temoatsü kanga angur. Ano taküm küm October ita nung anogo ana atema NCF Saisapong sentong liasü. Iba sentong ya küm nung khen alir. Ibala Saisapong ajanga lanurtemi pei sempet tejangjaba meteta akümer aser lanurtem tsüngda telongjem tajungba kümdaksür.

Asüingsashi sentong ka October 29,2016 nung liasü aser iba sentong nunglanurtem 43 aten. Tongtipangsa iba sentong nung Tsüngremi asenok nem agütsüba mapang koda amshitsü aser



mapang teimi amshiba ajanga kodaser pei nükjítong ataloka tamanger tajung ka akümer item tesayuba agütsü. Sentong nung atenertem parnok 10 tashi agi pei taküm Tsüngrem nem bendanga agütsüshi. Khristmas penzü sentong November 25, 2016 nung liasü. Sentong balala agiba sülen benjong chiyung liasü. Küm tepiyong sentong balala inyaka aru dang Tsüngremi aniba aser yariba tejangja meteta liasü.

NCF nung committee züngsem ka taküm küm tom nung tzü nung arakseta asüba lendong mapang ni kanga aoksaa liasü. Kü tenzükba wadang nung khuret tasaktiba ajurubaji iba mapang ya liasü. Ajisaka Tsüngremi kü nem tashi agütsüba ajanga item timtem aser shisabulu ajak kókteta liasü.

Kü dak tashi mait aser matongba jendi liaka Tsüngremi ni kodanga mesentoker. Pai ni teti moatsür aser yarir.

Tang NCF Mysore kechi jenjang nung lir iba ya nenok sarasadem ajanga lir. Nenok ajaki ano maneni sarasademjangma. Amen



*Dr. Edward Clark
aser tebuttsü
Mary Mead*

MISSIONARY 2016 REPORT

—❖❖❖❖❖—
Sentienla Longchar,
Nakhon Pathom, Thailand
—❖❖❖❖❖—



Missionaries tem cross-cultural training agiba mapang

Tamasa Kohima Ao Baptist Arogo dangi Yisu Khrista temeim salem abener. Sarasadema kidang nungi apusoba ama Thailand yimti 26th May 2016 anepdang 1:00 am nung atong. Aser iba anogo nungsa kú school Director-i ni talidak-i anir oa kú missionary aieni aoba (missionary journey) tenzúk.

Asen Nagaland Baptist Church Council (NBCC) kúbok aliba Nagaland Missions Movement (NMM) aser Church of Christ in Thailand (CCT) tsúngda Mission Partners asútsú Memorandum of

Understanding (MOU) yanglutepa lir. CCT kúbok Christian school 27 Thailand yimti ajunga nung tenzúka lir aser ni inyakba school ya iba Christian school 27 rongnung ka lir. CCT nung tenzúker onok missionary tem ajak agi 12- USA, Brazil, Korea aser India nungi aser onok dang Christian Volunteers in Thailand (CVT) ta ajar. Onok ajak jaka balala nung English tesayur ama Tsúngrem mapa inyakdagi.

Tsúngrem-i ni asoshi shimtsúba lima tenúng ya **Nakhon Pathom** aser Bangkok yimti nungi minute 50 dang agir. Nakhon Pathom ya Central Thailand nung yimti aika rongnung tajung ka lir. Aser ni tenzúkba school tenúngji “**Sawang Wittaya School**” koba tetezú “shisatsú agi sangwadaktsúba.” Iba school ya Christian Elementary School ka lir aser tanur ajak agi 300. Pre-school, Kindergarten 1-3 aser Grade 1-6 tashi lir. Tanur 300 rongnung Khristanji Kindergarten 1 nung tanur ka dang lir aser tanúngba ji Buddhist kibongtem nungi. School Directorji Mrs. Ubol Chaiwong aser la kúbok tesayur onok 19, Office staff 3, canteen staff 3 aser Chaplain 1 ta lir. Onok 27 rongnung Director aser Chaplain den tesayur onok 4 dang tamanger.

Intensive English Program (IEP) ta súr subject tasen ka onok school nung tenzúka kú nem sayutsú agútsú. School shia nung English compulsory subject lir aser ibaji Thai tesyaur-i sayur. Tanurtem shirnoksa English nung jangrar, shirnok kakat azúngba nung tajungtem lir aser shir tsúrabor-i fee agútsúteter parnok nem iba IEP agidaktsúr. Grade 1-6

nungi tanur 52 iba IEP ya agir. Iba school ya Christian school asú nung anepdang shia assembly nung Kibuba-i sayuba sarasadem pei oshi agi tanurtem aser tesayur ajaki sarasademer aser iba den Chaplain-i laishiba nungi tekong kar zúnga sarasademer pei pi class-i aor. Item tanurtemi Yisu Khrista aser Tebu Tsúngrem otsútem Scripture class nung Chaplain nungi angashir saka kwikati Yisu Khrista agizúka lir aji mejangjar.

Ni IEP class nung anogoshia mezúngbubaji English agi tanurtem den kúlemi sarasadema tenzúker. Aser aiben ni mashi tang tanur aikati “Teacher athithaan...” ta kú dang ashir, koba tetezú “Tesayur sarasademdi.” English jembitsú aser zúlutsúba dang masú saka ni maongka aika agia parnok nem Khristan ken video den sayur aser parnoki ibaji kanga jangra atener aser angazúker. Kenú anogo tanur tetsúr kati kú dang asúngdang, “Teacher, you like Jesus music?” (tesayur, nai Yisu indang ken jangrar na?) Ni langzú “Yes, I like.” Iba mapang nung la aser la medemer-i kúlemi langzú “I like Jesus music.” Yamaji tanurtem-i jembidang ken ken núksú alua Tsúngrem tenúng kanga asanger. Grade 1 nung tanurtem dang tsúrabor nungi homework kaket nung sign asútsú Thai tesayur kati meyipzúksú dang, tebur chanu kati langzú “kú tsúrabor anaprongla núkpoker tem lir, koma asútsú?” Ibaji angashir tesayur kena prongla kanga dang temulung shirang aser pa dang kecha masúr ta ashi. Saka iba tanur ya kanga dang tekulok techira aser class nung tajungtiba rongnung ka lir. Tsúngrem dang kanga pelar.

Tanurtem sayuba dak alaka **Thai Tesayur nem English class** hopta nung 4 pen agútsúr aser **Hombar anepdang shia Tsúngrem O lemsateper**. Thailand yimti temzúng nung “Freedom of Religion” ya par núbur shiai benshir. Kúm eshika tejaklen Khristantem rishikangshia liasú saka dangbo kechi tamangba súdir ajaki pei tamangba nung akanga amangtsú aser tangar tamangertem nema akúmtsúbo agútsútsúla ta temzúng nung zúlua lir. Anungji shiti súrbo kecha balaka tenokdangba aser rishi kangshi mali, kodangsa osang tajung lemsatepdir aikati angar saka temulung ajak agi mejangrar. Anungji yangi alir tesayur mamangertem asoshi kanga dang sarasadema alir. Tsúngrem-i Pa mapang tajung nung mapa tulu inyaktsú ta amanger.

Ni alidak tesem nung **Bangkok Christian Hospital** branch ka lir aser iba hospital nung inyaker doctor, nurse aser staff tem asoshi apartment tasen ka yangluzúker liasú. Ni kodanga meimlaba mapang ka nung kú nem iba apartment nung alitsú renemtsú. Ibaji dang masú saka **kú nem English class agútsútsú** asúngdanga liasú. Anungji hopta ka nung class ka, department ajak nungi head tem arua agir. Kanga dang jangratemtsúkaji parnok ajak kúm 35 tema nungi 55 tashi lir. Aji súaaka parnoki English angazútsú kanga dang jangrar aser meranga class-i arur. Parnok 20 rongnung Christian 5 dang lir aser tanúngbaji Buddhist lir. Class metenzúkdang ni parnok ajak dang ashir, “Ni Khristian ka lir aser ni asenok ajak asoshi Tsúngrem dang shisatsú meshia sarasademner.” Anungji parnok ajaki kanga dang mulungsoa sarasademer. Tsúngrem-i mapa inyakbaji angur aser Pa nem teti tenúngsang agútsúr.

Deobar shia Nakhon Pathom Chinese Church nung atener, iba ya Chinese-Thai lokti

senten. Onok school ya iba arogo ajanga tenzúk aser tanú tashi kúlemi Tsúngrem mapa inyaker. Ni college azúngdang nungi tesayuba mapa ya kanga dang jangra liasú. Tsúngremi Pa chirtem aser Pa núbúrtem tenzúksú, ni renemdaktsú súdita ni amanger. Pa taochi ajanga tanú tashibo alima timtem lendong nungi kúmzúka Pa tenzúkba mapa nung kanga dang jangradema inyakdar. Tanela rarabo teti ajangshir saka Pai teti anir. Tsúngremi Pa chirtem kodanga yaa- tzúra meyutsúr ta ashibaji shitakba kú takúm nung ajangshia arudar.

Kúnú sarasadema alidang kú nem iba tekong agútsú- *“tanú ni nenok nem agútsúba temelaba O nenoki angadi súra, Kibuba nenok Tsúngrem meimdi súra, aser nú mulung ajak agi pa tenzúkdi súra, mapang shitak nung ni nenok linúk asoshi tsúnglu yoktsú, oda, mezúng tsúnglu aser tesuben tsúnglu agútsútsú, anungji nenoki nenok tsúk, yi aser totzú bendentsú. Aser ni nenok kiset shiruru asoshi nenok moapu nung ayi ayokdaktsútsú, aser nenoki achitsú aser nenok tepok asúngtsú”*- **Tazungkunem11:13-15**. Tanú Tsúngremi kú nem mapa aika nunglokja lir. Alima tashi agi bilemdangbo shiti súra kanga dang belemer saka kodang anogo tembangdir Tsúngremi tashi agútsúba aser Pai mapa inyakba bilemdang kanga dang pelaa, anizúngzúka mejanger. Tanú iba yimti nung metsúprokba ya kenúbo súngjang tajung atangtsú aser Tsúngrem yimli yangertsú ta sarasadema tenzúkdar.

Ano maneni KABA nung toklang tenzúkertem aser arogo pur ajaki onok asoshi sarasadem nung teti bilemtetba atema kanga dang pelar. Nenok sarasadem ajanga tanú onok anema lia Tsúngrem tenzúkteter. Kanga dang pelar. Tsúngrem-i asen KABA teti moajang aser amshiangma.

Sarasadem Onúk kar

1. School building tasen yangludar, koba nung ni aser CVT tasen ka asoshi room ka ka alitsú. Ibai asoshi senotsú leman núngdaker. Anungji sarasadem nung bilemtetdaktsúner.
2. Tanur aser tesayur mamangertemi Tsúngrem temeim tali meteta akúmtsu asoshi sarasademjang.
3. Bangkok Christian Hospital, Nakhon Pathom nung doctors, nurses aser staff mamangertem asoshia sarasadem nung bilemdaktsúner.
4. Onok CCT nung missionary 12 nem Tsúngremi tashi aser shisatsú tali agútsútsú sarasademjangma.



*Onentiba Jamir & Sentienla Thailand missionary
nunger balala den*

NAGA CHRISTIAN FELLOWSHIP AIZAWL OSANG

Benjamin Kichu



“Kechiaser Kibuba tajung lir. Pa temeim taochi aser putu ajak dang pa temulung lemtetba tatem maka”. Tenünsang Ken 100:5

Asen arogo pur ajak dangi Yisu Khrista temeim salem abener. NCF Aizawl-i arur August ita küm asem (3) abensaogo. Tsüngrem tenüng asanger aser asen KABA danga kanga dang pelar. Mapang ajak nung sannüker aser Mission Coordinator-i anir, arogo purtemi ni aser ozü kibong aser NCF Aizawl yariba atema kanga pelar.

NCF Aizawl, Mizo arogotem den tesendaktep kanga junga ayur. Iba yongji, parnoki (Baptist teloki) parnok tenlaki deobar shia amshitsü melar. Iba dak alaka telok balala –Laymen's Evangelical Fellowship of India(LEFI) , Veterinary College Christian Fellowship (VCCF) , Evangelical Union(E.U) , Achik Christian Fellowship- Garo Fellowship (ACF) , Khasi Christian Fellowship (KCF) den mapang shia sentong balala agia arur. Item telok asoshi Joint Fellowship tulutibaji Easter Sunday Service lir. Iba sentong ya NCF Aizawl-i ayonga tenzük aser, joko küm ishika kanga jangratema/longsoa agidar.

Aizawl nung Theological College ana lir. Aizawl Theological College (ATC) - iba college ya Presbyterian teloki lapokba; aser Academy of Integrated Christian Studies (AICS) - ibai Baptist teloki lapokba. Aizawl Theological College nung Naga nunger Doctoral studies agirtem nisung 4 aser M.Th agir nisung 10 lir. Academy of Integrated Christian Studies nung



M.Th agir nisung 2 lir. Mizoram University (MZU) nung parnok nisung 17 lir. Parnokji Masters aser Doctoral studies agirtem lir. Mapang ajak nung NCF nung shilem tajung agir. Lenmang talang asünung aiben parnok bushia oa sarasadem mapang agir. Veterinary college nung Naga nunger 20 lir. Iba veterinary college nung Christian Fellowship deobar shia anepdang 10:30

nungi sentep agir. Ita shia mezüngbuba deobar VCCF nung oa atener aser Tsungrem osang lemsateper. Tanga State nungi aruba lanurtemi NCF Aizawl nung kanga dang meranga shilem agir aser atener. North Eastern States nungi aruba lanurtem den tesendaktep tajung ayutsü meranger. Kin aser tesem balala nungi arurtem den inyakaTsüngrem O lemsateptsü kanga jangratemtsü ka lir.

Regional Institute of Paramedical and Nursing Sciences(RIPANS) nung azünger Naga nunger nisung 50 aser Naga nunger kibong 9 aser kija mapa inyaka alirtem parnok 15 lir. Deobar tekülem nung nisung 50-90 arua atener. Studenttem tatidang mapang 40-60 aser special Sunday nung 130-140 tashi arua atener. Ita nung deobar ana (2) mesüra asem (3)nung bo nisung tasen, mezüngbuba atenertem alir. Nisung ajak pei-peï mapa nung prokshir alinung, parnok mapang apir bushia aor.

Küm asem (3) Tsüngremi anema yutsü nung, memeteti sua ogo. Mazünger aiben alir, saka pela-a alir. Friday aonung shia hostel balala nung Bible study aser tekülem mapang agija aor. Lai bushiba mesüra tekülem mapang agiba dang masü saka, iba mapang nung parnoki parnok nündaktema lemsateper.

NCF Aizawl asoshi sentong tulutibaji *Annual Youth Camp* lir. October ita puja mapang nung iba sentong ya alir. Taküm küm iba sentong October 7 nungi 9 tashi liasü. Item mapatem mazünger inyak dang, parnok den külemi aibenTsüngrem O lemsatepba sarasadem mapang agi. Onok ajak asoshi kanga dang temoatsu mapang liasu.

Taküm küm kija mapa inyaka alirtem aika Aizawl-i transfer aru. Kibok nung aiben parnok ajurua liasü. Kija alir asünung, pei mulungba nung lia aotsü kanga dang mela-a lir. Anungji aiben parnok den sarasadem aser mapang endoka arur.

Taküm kümTsüngremi ozü kibong kanga dang meima jabaso ka October 21, 2016 11:32 am nung moatsüogo. Pa tenünger Chendipong Aaron Kichu lir.

NCF Aizawl tenzüker taküm agi kum ter (10) buba lir. Anungji onoki taküm küm project ka tenzüksü lemtet. Iba project tenünger *Decennial Project 2016* lir. Tarutsü nükla yur ali (plot) bushia tenlaki ka yanglutsü sentong tenzüko. Onok ket nung kecha maka, saka sarasadema lenmang palala bushitsü tenzüko. Bank nungi loan agia asa-meyangtsü tenzüko. NCF nütsüngtem ajaki iba project asoshi kanga dang meranga peipei sasep nung inyaker. Asen arogopurtemi-a iba project asoshi bilemteta sarasadem nung yaridaktsüner.

Tsungremi yaria aser len ania sentong balala takok ngua arur. Taruba küm (2017) *A Year Of Discipline* ta sür sentongtem agia aotsü renemogo. Ita shia theme ka-ka yur lai bushiba sentong alitsü. Mezüngbuba ita nung Okila (introduction) agitsü. February nungi tenzüka küm tatem tashi theme balala agia aotsü aser December nung thanks giving &



closing alitsu. Item theme ya Galatians 5:22 (fruit of the spirit) nung ajemdaker agia aotsü.

NCF Aizawl otsü nung(history of NCF Aizawl) mezüngbuba Sunday School taküm küm nungi tenzük. Ajak agi tanur terana (12) lir.Tsüngremi moaja tembangogo.Taruba küm ano tajungba nung agia aotsü renemer. Nenok ajaki tanur aser tesayurtem atema sarasademjangma.

Tetenzükdang (2006), lanurtem sentep mesüka tenzük, saka arogo (full fledged church) ama inyaka aotsü kanga dang meranger.Taruba küm (2017) asoshi tebilemba aser teinyaktsü aika dang lir.Asen arogopurtemi NCF Aizawl atema maneni sarasademjangma.

Küm asem (3) meyipa reprang dang, Tsüngremi moatsüba, len aniba, yariba aser kümzüka ayuba aika bilemteter. Tsüngremi moajangma



MISSIONARY 2016 REPORT

Onentiba Jamir, Thailand



Tamasa Trang Christian School nungi ajak dangi Yisu Khrista temeim salem abener. Ni Trang Christian School nung Christian volunteer tesayur ka ama inyaker. Iba school ya 1915 nung Protestant missionary ajanga tenzük aser Trang provience nung ajak dang tejentiba school lir. Tanü tashi nung iba school nung student zungsem 2600 lir aser tesayur aser staff ajak agi 100 lir. School nung züngsem ajak rongnungi Christian tesayur aser student 9% dang asütsü. Iba school ya Christian tesayuba nung amendaker inyaker aser osang

tajung kuli asütsüba kanga tongtipang ta angateta inyadi. Trang Christian school nung Christian education department-a lapoka lir aser iba den kulemi Chapel nung yaritepstü atema Theology azünger tesayur ana tashi lir. Iba department ajanga school nung azünger lanurtem ajak dang Tsüngrem-O sayur, retreat sentong aser Bible quiz ayongzüker, tesayur telongjem akar aser counselling agütsür.

Trang Christian School nung ni class 1,2 aser 3 sayur. Ajak agi hopta nung student 480 dang anaben ren sayur. Tetenzük nungbo oshi bala asüba ajanga tanurtem dang sayutsü kanga dang tasak liasü. Ni Thai oshi kanga junga mejembitet aser yangi aliba tesayur aser student-i English junga mejembitetba ajanga angatetsü tasak asü. Saka yangi aliba foreign English tesayurtem teyari ajanga ni tangazükba tulu ngudaki.

Trang town nung sentep asem lir aser deobar nü ni Trang Christian sentep nung oa atener, brehostibar nü youth cell group nung atener. Iba Trang arogo nung züngsem 2500 shir aser item rongnung nung Baptist 2000 lir aser non-Baptist 500 lir. Iba arogo ya küm 100 tain aser Trang nung arogo ajak rongnung tejentiba lir. Iba arogo ajanga Tsüngremer osang tajung sayua yimtsüng leni aor, kidang sentep tenzüktsür, sensaker kibong nung tanurtem nem scholarship agütsür, aluyimer-i tsünütetba ayoktsü maparen nung yarir aser radio ajanga Tsüngrem wadang inyaker. Ita eshika nungi kü taküm-a English Bible study telok aser youth telok nung tena kanga temoatsü ngua arudaki. Ano deobar-nü arogo nung senior tenzüker den kiboksem aor aser



Sentep nung mezüng Tsüngrem agizüker asoshi pastor-i sarasademer

ni-a kü taküm kuli aser Tsüngrem O ajanga nüburtem ajungshia arudaki. Yangi aliba amangba purtemi India lima ka nung , Nagaland state nung 90% Christian lir ta asüdang kanga süngmanger aser parnoki Tsüngrem nem tenüngsang agütsüja liasu. Aser iba mapang ka nung , asen lima nung Khristan majority ta jateter alidang ano maneni Tsüngrem temeim alima dang sayua pai mulungba nung alitsü indang shisadanga liasü.

Kü den dang ya tanur tebur chanu, class 11 nung azünger ka külemi lidar. Iba tanubusang tzüraburi school fee aser bus fare magütsüteter ta school Directorla-i shia liasü anungji pa kü den school guest house nung angati lidaktsütsü mulungtet. Iba ya Tsüngremer temoatsü ta angateta Pa nem tenüngsang agütsüa liasü. Thailand nung tesayur ka takümji kanga bendanga agütsüla aser tajungtiba nung sayutsüla. Classroom nung sayuba dang masü saka iba dang tali ano mapa jenti inyaktsüsa akümer. Student mapang shia tendanga alitsüla, school gate nung nokdaker tanurtem anepdang arudang pela agizüktsüla aser nikondang nokdaker parnok dang junga oang ta ashitsüla, parnok lunch break mapang chiyongtsü alemtsü, senshi dang traffic duty inyaktsüla asur tesayur shiai anepdang 7 nung attendance agütsütsüla aser nikongdang 4:30 nungang school nungi yoktsüla.

Thai culture aser libaliro ya kanga dang tasüngtet aser parnoki pei culture aser libaliro kanga kümzüka aser meruükteta ayuttsü meranger. Thailand nung ni "Wai" ta asüba inyakyim ka angazük aser ibaya nisung nem akümtsübu sayuba inyakyim ka lir. Parnoki küm nung tain purtemdang aser ajak dang taka mateper apudaka akümtsübu sayur. Asenok Naga nunger ama Thai nunger kanga dang teyarinü aser aiener dang yimya awashi tajung sayur. Ni asoshi Thailand-i arua inyakba ya anogo shia teinyaktsü maparen tulu aser tangazükba tasen lir

aser ibai ajanga kü ali shi aser tanela nung maneni renemshia alir. Tsüngrem temeim sangdongtsübaji ni atema wadang tulutiba aser tongtipangtiba lir aser ibai ajanga ni tanü tashi ajungshia lidaki. Talidak tasen aser nüburtem tasen den alidang, timtem jenti ajuruaka tanü tashi Tsüngrem taochi aser shisatsü nung ni liyonga arudaki aser asen arogopur-i maneni sarasademtsüba atema kanga dang pelar aser maneni kü taküm aser Tsüngrem wadang asoshi temotsüba aser teyari meshia sarasademdaktsüner.



Christian Volunteers, Church of Christ Thailand ten inyakterem alima tesem 5 nungi India, USA Germany, Korea aser Brazil. Asenok Naga nunger onük 5 lir. Volunteers retreat mapang akiba noksa.

KABA MISHMI AGAPE MISSION: 2016 OSANG

—❖❖❖❖❖—
Mr. Tiamoa Yaden
Mission Coordinator
—❖❖❖❖❖—



Tamasa amangba pur ajak dangi ozü kibong aser Mission field nung amangbapurtem ajaki Yisu tenüng nung temeim salem abener. Mission field nung ozü kibong, short term Missionary Ms. Imtichila Jamir aser amangbapurtem ajak junga lir. Tsüngremer wadang tulu inyaka aodang Satan ain atoker aser asemen tashi mamangeri ki tonga arua amokmerena liasü saka Tsüngrem tajungsangi amangbapurtem sarasadem langzua onok kümzüka toktsü nung Pa tenüng asanger aser amangbapur ajak dang nenok sarasadem teyari tulu asoshi pelaba lemsateper.

Ozü kibong bhara (rented) ki tila ka nung lia wadang tenzüka inyaka arua alidang asen Arogo ita tenet tsüngda nung asen Mission Co-Ordinator ki aser guest house ana süa, September 23, 2016 anogo nung Rev. M. Asangba Longkumer-i anir Mission Board züngsemtem alua ki meshiteta semzükgoko aser tang ozü kibong ki tasen nung satemsatema pela lidar. Asen Arogo dang pelaba metetdaksür. Mapang ajak nung asen Mission Directori maparen ajak nung ni aser ozü kibong den yaritepa aruba asoshi pelaba metetdaksür.

Küm tsüngda Mission Co-Ordinator wadang tatsü agi yamai lemsateper -

Oshi aser Sobaliba angazükba:

Mission guideline nung taküm ya Mission Co-Ordinator tongtipangsa oshi aser sobaliba angazüktsü ta lir. Yamaji tang tashi oshi aser sobaliba angazükba nung mapang peria agia angazüka arudagi. Tsüngrem teyari ajanga Hindi kanga junga angazüka odagi aser Mishmi oshi tajungba angazüktsü merangdagi. Iba den külemi küm tepiyong Mission ki yangluba mapa nung akokba tashi yaritepa aruogo.

Arogotem Semdangba:

Asen Mission field temeküt nung MBCC kübok aliba Arogo pezü aser Fellowship asem lir. Item Arogo aser Fellowshiptem nung kibongtem tetsüngta talanglang pilar aliba ajanga sentep deobarnü dang agir aser Mission Co-Ordinator deobar shia Arogo aser Fellowship balalai oa Tsüngrem O tesayuba agütsür. Hopta tsüngda nung akokba tashi Pastortem den mesera kü kija kiboksemi aor.

Tanela Anir aruba Wadang:

Asen Arogo ajanga Mission Co-Ordinator den yaritepa tenzüksü asoshi local Evangelist, Mr. Sonjong Minin, shima lir aser tanü tashi kanga junga tenzüka arudagi. Ki yangluba maparen nunga pa ajanga teyari tulu agüja inyakogo. Akokba tashi mamangba

purtem den kulisüba wadang inyaka arudagi.

Tsüngrem taochi ajanga nisung terok tashi taküm nung Yisu agizüka April 17 aser October 9, deobar anogo tem nung Lamliang Baptist Arogo nung baptism agiogo.

Lanur aser Tila tanurtem den inyakba wadangtem

Asen Arogo ajanga yokba short term Missionary Ms. Imtichila Jamir kü den yaritepa tenzüksü yok nung kanga pelar. October ita nungi tenzüka la ajanga Youth fellowship, Sunday school aser tuition class agidagi.

Youth fellowship: Saturday evening shia youth den fellowship agir aser iba sentong nung youth terpongu (15) arua kanga temoatsü ngudagi.

Sunday school: Sunday anepdang 6:30 - 8:00 ako tashi tila tanurtem den Sunday school agidagi aser iba sentong nung tanur 43 arua kanga temoatsü ngua angazükdagi.

Tuition class: Monday - Friday mapang ana lemsar tanur tuition class agir aser tang students 66 lir. Item rongnung mamanger tanur 10 lir.

House Fellowship tasen tenzüka - Taküm küm house fellowship ana tenzüka liasü.

Pali Bosti Baptist Fellowship: July 16, 2016 anogo nung Namgo Baptist Arogo kübok Pali Bosti nung Adivasi nunger tamangertem asoshi house fellowship ka tenzüka liasü. Iba fellowship nung tamanger kibong pezü lir aser tanü tashi kanga junga odagi.

Kamlang Nagar Baptist Fellowship: September 4, 2016 anogo nung Namgo Baptist Arogo küboksa Kamlang Nagar nung house fellowship ka tenzüka liasü. Iba fellowship ya kibong asema tenzüka aser tang ano Mishmi nunger kibong ka nungi atsünga aliba kinungtsü aser tanur iba fellowship nung arua tendagi aser anasa aliba yimtsüng (Kamja) nungi prayer center nung tasen baptiba tantsür ka aser mamanger tantsür ka ta arua atener. Iba fellowship ajanga akokba tashi iba tesem nung aliba mamangertem aser ana nung aliba yimtsüngtem osang tajung ajanga atongtsü teyimla nung sarasadema inyakdagi.

Tatem nung, maneni ozü kibong Kibubar wadang nung takok asoshi, field nung amangbapurtem aser sama-a aliba tanelatem asoshi sarasademtsü mepishir.



Mishmi Agape Mission Center ki
dedication Sept 23, 2016



Arogo lenir training Nov 25-27, 2016

MISHMI AGAPE MISSION CENTRE NUNG CHILDREN MINISTRY OSANG

—❖❖❖❖❖❖❖—
Amenla Longkumer
—❖❖❖❖❖❖❖—

KABA Mission Departmenti achayanga Mishmi Agape Mission Centre-Medo nung Children Camp ka liasü. Iba sentong ya November 12 – 14, 2016 nung liasü. Asen arogo nungi lanurtem onok asem (Amenla, Opangba aser Mayang) den Atula, Mission Centre nung missionary tesayur, onok külemi yaritepa iba sentong kanga dang junga agia liasü.

Arogo 4 nungi tanurtem ajak agi 114 iba camp nung aten. Tanurtem telok 4 küma lemsa- Dawid, Daniel, Esther aser Paul ta tenüng agütsü. Iba camp nung tongtipangsa Laishiba otsü, lai tekong temolung agi angazükdaktsüba aser ken balala sayu. Tanurtem ajaki tejangraba tulu nung shilem agia liasü. Ano tanurtem aikati class mapang jilia aruagi ataba ngua onokang parnok nungi yimya tajung angazüka liasü.

Sentong tatempang nung tanurtem nem sempet agütsü aser Camp nung atenertem ajak chiyungba mapang liasü. Iba sentong ajanga tanurtem aika tanela temoatsü angu. Iba mapang ya onok asem asoshi-a tanela nung renemshiba mapang ka liasü.

Arogo ajanger oa Tsüngrem mapa inyaktsü KABAi maongka agütsüba asoshi kanga pelar. Arogopurtem sarasadem teyari ajanga sentong ajak nung takok anguba atema pelaba ozü asempronglai metetdaktsür. Tsüngrem tenüng asanger.



MAM children's ministry team, Tiamoa
aser Sobuienla



Tsungremi moatsuba chi chiyunger



Mishmi Agape Mission children's ministry Oct 2016

THAILAND NUNG SHORT TERM MISSIONARY: OSANG

—❖❖❖❖—
Charemnaro Pongen
—❖❖❖❖—

"Shibai osang tajung bener arur, tesünep metetdaksür, tajung indang osangtajung bener arur tekümtet sangoktsür, shibai Zion dang 'Ne Tsüngremi chubar' ta ashir, tenem nung pa tetsüng koda tobur tajung lir!"
Isaia 52:7

Tsüngsemi nisung ka indang aika ashitsü akok. Kü tsüngsemi o jembitsüka asübo parnok kongisa ao, kechisa angu aser ajangshi itemji aika shila. Thailand lima nung mapang tatsüka missionary mapa inyak dang mamatettsüsa tajangshiba aser kü mulung nung tejembibatem kar lemsateper.



Rev. Arenla Longchar, Mission Director, KABA, lai sarasadema tekümdangtsü aser temetettsü o kar onok dang ashi aser kü den Ochimeren aser Rongsenti Short Term Missionary inyaksü asoshi sarasadema apuso. Kolkata nungi tayimtsüi ao aser kecha timtem makai Thailand lima atong. Par lima kodang atong, nisungtem libaliro, oshi aser sobaliba kenyongi balaka angu. Parnok ki, yimtung aser lemanng ajak temerük. Ano nisungtem tanur tain ajak kanga temerük aser pela-pela-a angudang temoatsü kanga angu.

Asenok aikati meteta aliba ama Thailand ya Buddhist yimsü nung akangakanga amangba lima ka lir. Lanuwa mapang sobaliba aser yimsü balaka amangba nübortem dangi Khrista yimsü bener aoba otsü mesüra osang angashidang item tasüngdangbatem kü mulungi arua liasü.

1. Yimsü balaka amangertem koda sür Khrista dangi anir arur?
2. Missionarytem rishikangshi dang kechisa ataloker?
3. Yangji parnok koda alir?

Kü mlung nung tasüngdangbatem atema telangzüba anguba dang masü saka Tsüngremi ni Thailand lima anüdoklentip, Nan District nung aliba Pua yim tashi anir ao. Yangji onok Kathy's Home nung liasü. Oku Maken aser tebuttsü Onü Naro tenati "The Firm Foundation" ministry ya tenzük. Aser Kathy's Home ya iba ministry ajanga atokba tejang lir.

Kathy's Home nung tanurtem ajak agi 40 lir. (tebur 18 aser tetsür 22) Tanurtem ya HMONG kin nungi aser parnok ya refugee kibongtem nungi lir. Thailand nung refugee tanurtem aika Buddhist yimsü amangertemi skol züngdaksütsü tatemtsü sür anir aor aser Buddhist yimsü amangdaksür. Tanurtem iba timtem nungi kümzüksü nükjidong nung Kathy's Home ya lapok. Yangi tanurtem angati lidaksür aser Government Skol tajungtiba

nung züngdaksür. Tangbo Kathy's Home nung lia azünger tanurtem aika nurses, engineers aser lokti nung tongtipang nisungtem kümogo.

Kathy's Home nung aliba tanurtem hopta nung khen pei yimtaki aor idangji medemertem aser kinungertem dang Yisu temeim indang khuli asür.

Hopta tepiyong Ban Prang School nung English sayu aser nikongdang Kathy's Home nung aliba tanurtem den lai zünga sarasadem. Ano parnok lesson bushiba mapang yari. Hopta tatempang nung yimtsüng balalai oa khüli asü. Thailand nung mapang tatsüka alidang Khristan tajung aika ajuruba dang masü saka parnok talidak ki tonga oa Tsüngrem temeim, tanela tangatetba aser ali rongsen lemsateptsüsa maongka anguba atema kanga dang pelar aser Tsüngrem tenüng asanger. Talisa Oku Maken aser par kibong nungi tajung aika angazük. Oku Maken, pai Paul ama bilemer aser jembishinü ajonga tangatetba agi sünga lir. Onü Naro ya Apijemtsü Shin tapu 31 nung zülua aliba sempettem sobua aliba kinungtsü tajung ka lir. Tena nem Tsüngremi tanur asem –Stephen, Jason aser Phoebe moatsü aser parnok ajak terenemjem Khristan sepia kaka mesüka lir. Ano asen arogo nungi missionary ana – Rongsenkala aser Bendangakum ajuruba ajanga ni temoatsü tulu angu. Parnok Tsüngrem tsübuba taküm kaka lir aser parnok shisatsü, sempet, tangatetba aser pei akaba ali rongsen ajonga tangar den pelatepa lemsateper. *Parnok kecha maka saka ajak kar.*

Thailand nung mapang tatsüka alidang yimtsüng aikati tonga oa parnok libaliro aser tekülem yimya angu aser aji ni asoshi temoatsü tulutiba ta bilemer. Yimtsüngtem nung tebur tajung aser talang nungi angutsüsa tenla ki tulu mali. Microphone, kongki aser menden mali. Tekülemi arur ajak pakti lemer ali nung amener. Ano ken kakat dang masü Laishiba-a aika ket nung mali. Ajisaka, Tsüngrem külemtsü tejangraba dak alaka parnoki Laishiba aser ken kakat asoshi shisa mebulur.

Kidang nungi sarasadema apuso aser alima balaka nung oa mission mapa inyakdang alima tekong tenem aser nisungtem tereprangtsü, sobaliba, yimya balala ajurudang Teyanglur Tsüngrem shisa akaba tali tejangjaba meteta aru. Thailand nübortem tamang tongmelang saka temeim mapa inyakba nung kanga tashi tait aser ibaji angudang ni-ang tali temoatsü angu.

Teyanglur Tsüngrem atema mapa inyaktsü Kohima Ao Baptist Arogoi maongka agütsüba aser alima tasen nung oshi balaka jembiba nübortem rongnung mission mapa inyakdang Oku Maken aser par kibongi yariba atema kanga pelaba metetdaksür.

“Nai tera agütsüba ajanga mapa tulu inyaktsü akok,

Mesüra nai missionary ka yokba ajanga kar Khrista dangi anir arutsü”



STM Ochimeren school tanur dang English sayur

TATEMPANG MALIBA MISSION MAPA TETENZÜKDAK: Rev. Dr. T. Alemmeren

By Charemnaro Pongener.

“Tenyaba mapa inyaksü asoshi tangar lima kati oa parnok mangu tashi aser parnok den lia tajangshiba balala maka tashi nai tenem kolak tebur ajungba mangu ama parnok ala-ashi aser maka mait tia mesüra Tsüngrem sentong memetettsü”

Dimapur nung meiwa mapang, teroto suir külen mepong aoner saka tsünglu aruba atema pelaseta Rev. Dr. T. Alemmeren bushia ao. Ki thatem (stairs) eshika tur külen pa ajuru. Yakta tang pai “Salem-a ni!” ta shia ni pela-a agizük aser kü den salem. Tasoba küm 85 tain shibadang *Tamang Nisung* ta ajar, pa dak aria bilemba aser tamang katetba shisangshisanga ni ajitet. Taküm tepiyong anüpu aser moabu nung Tsüngrem mapa inyaka senzüba ajanga pa tenük küp ashireper ni angu. Ibaji alima dang pa taküm küli lir. Pa tejak küp ashirepba taren shia jagi Khrista den tatempang maliba mission mapa inyakba indang sayur. Asenok ajaki meteta aliba ama Rev. Dr. T. Alemmeren ya Tsüngremi mezüja shimtetba tenzüker aser mangdang tulu akaba missionary ka lir. Pai India nung dang masü alima tesem balala nung küm 57 tashi Kibuba tenzüker. Ano ABAM, NMM, CBCNEI ASER JCIAM etc. nung pa taküm aser sempet ajak agi Tsüngrem aser nübortem tenzüker.



Rev. Dr. T. Alemmereni ni pela-a agizükba sülen pa office-i anir ao aser idakji kakat tajung aika akümketa yua angu. Pa kakat azüngtsü jangraba taküm ka dang masü saka kakat zülur tajung ka lir. Mission khuret aser tajangshiba indang ni asüngdang dang pai yamai menürema langzü, “Mission Alizüng ya Tanela Temeshi-i agütsü. Kübutsü küna 1981 küm Yirusalem nung alidang India, Nepal, Bhutan, Burma aser Chinai aotsü Tsüngremi mangdang agütsü”. Tsüngremi jungkai atoka sayuba sülen tashi angaa memetetba lima kati parnok apuso aser December 25, 1993 nü Hongkong atong. Tamang agi tashi anga-a apusoaka parnoki timtem aika ajuru. Nisungtem oshi, sobaliba aser parnok libaliro kenyongi balaka. Mapang tatsüka parnoki shinga danga Yisu khuli mesüteti Tsüngrem dang jepa sarasadema liasü. Tsüngremi parnok sarasadem langzü aser Underground aser Overground Railway Stations, Parks, Bus aser Rong Anentak ajaki oa khuli asütsü Tsüngremi tetuyuba agütsü.

Anungji parnoki item tesem ajak nung sarasadema senzü. Tanabuba nung item tesem ajak nung Tsüngrem O züluba kakettem lema senzü. Tasembuba nung item tesem ajak nung tasü ita ken aten aser nisungtem dang Yisu Khrista indang khuli agütsü. “Aiben Policei onok aritok. Kari onoki agütsüba 'tracts' magizük aser karibo meshir onoki ngua shisa-a entok” ta pai ashi. Nisungtemi yamaji inyak dang onok temulung animesüngzüki liasü. Mapang tatsüka yamaji inyaker külen danga lima nungi aruba Tsüngrem tenzükertem den külemi longjemer Khrista indang khuli asütsü leman lapoktsü.

Kesa mapang nung Home Church ka Hongkong nung tenzüksü Tsüngremi tetuyuba ka agütsü. Anungji China nunger kibong ka den yaritepa November 20, 1994 nung arogo ka tenzük aser iba arogo dang Antiok Khristan Fellowship ta aja. Kodang Hongkong nung Home Church tenzük, Tsüngremi mamangertem temulung kishi lapoktsü. Nepal lima nungi aruba aser Hindu yimsü nung kanga akanga amangertem parnok terok, Hari, Surdarsan, Nabin, Mik, Santosh aser Yankei Rev. Dr. T. Alemmeren aser par kibong den metetepa aküm. Mapang tatsüka tsüngda nung parnoki Yisuji kü taküm nung Kibur aser Kümtetdakba ta agizüka February 12, 1995 nung parnok tzü nung tzüsen. Iba anogo nungi parnoki Hongkong nung aliba Nepal nunger aika Khrista dangi anir aru. Tangbo Hongkong nung Nepali arogo 5 kümogo aser item arogotem longjemer Nepali Khristan Convention kübok mapa inyaker.

Ano Hongkong nung aliba African Refugeetem rongnung Tsüngremi mapa kanga inyak. Item refugeetem kanga timtema alir saka parnok den Tsüngremi jembi aser taküm nung temelenshi atok. Parnok aika Antiok Khristan Fellowship nung züngsem aküm. Yimtong nung sayutsüngiba aser aonung tepiyong sarasadem sentong nung parnoki kanga junga shilem agi aser item sentongtem ajanga Tsüngremi mapa tulu inyak.

“Hongkong nung küm 10 tashi mission mapa inyakdang yimtong nung sayutsüngiba aser khulisüba mapa nung temelenshi tulu atok” ta pelaseta Rev. Dr. T. Alemmereni ashi. Pai züluba tract 'Yisuji Taküm Lir' iba ya tamasabo nisungtemi magizük. Saka tangbo nisungtemi iba ya agizüker aser nentaka azünger. Yimtong nung Tekülem aser Tetoshi (Praise and Worship) sentong alidang Tsüngremi onok yariba aser amshiba aika lir. Yimtong nung Tekülem aser Tetoshi sentong alidang senzüsembonger aikati arua onok den aten aser shlem agi. Parnok aika temulung meyip aser Yisu agizük.

Rev. Dr. T. Alemmeren dak tangar meimba, tamang katetba, tamang takang aser tongmelang angatetba agi mission mapa inyakba ajanga jentipur taküm melenshidaktsü. Pa ama mission mapa nung tajangshiba aika aliba aser mission wadang mechi taküm nung Tsüngremi mapa inyakba chichia metetba nisung ajurua sensakasemtsü maongka anguba asoshi ni kanga pelar. Nagaland aser alima tesem balala nung pa aser par kibongi mission mapa inyakba tebang agi meshimatsüsa aika lir. Pa tasoba küm 85 ajisaka tanga pa tamang, tejangraba, mangdang aser shisatsü ajonga mission atema mazünger lir.

“Kü shisatsü, sempet, rongsen aser mapang tajungtiba tila tanurtem aser lanurtem atema amshitsü Tsüngrem mapa tetenzük dang nungi kü nem agütsü. Parnok metenra asüng jenjang aser mission mapa mali” –Rev. Dr. T. Alemmeren.

UTTARAKHAND MISSION TRIP OSANG

—❖❖❖❖❖—
Amenla Longkumer & Aben L. Aier
—❖❖❖❖❖—

Uttarakhand State nung aliba Bhengi aser Dunda, item tesemtem nung April 15 – 20, 2016 Vacation Bible School (VBS) liasü aser iba osang tatsü agi lemsateper.

Asen arogo nung Mission Department-i anepalua lanurtem onok 12 (Ter ana) Uttarakhandi ao. Mapang jilia onok teranaprong Hindi ken aser VBS nung sayutsü lesson ajak Hindi oshi agi angazük. Sarasadema apusoba ama timtem makai Dehradun atongdang Meyiküzmük, NCF Pastor aser pa kinungtsü Bethel tenati onok kanga pela-a agizük. Tesem anati aotsü asünung onok telok ana aküm- Team Samuel aser Team Esther. April 14, 2016 nung telok anaprongla pei pei tesemi apusoa ao.



Bhengi nung missionary Merangba, Longkhüm yim nungi aser kinungtsü Anungla par kibongi onok kanga junga anepalua liasü. Idakji tenati School Mt. Zion Academy lapoka lir. Iba school ya lapoker küm 10 shi lir. Iba school nung class LKG nungi VIII tashi lir aser student 170 den tesayur 12 lir. Parnok rongnung Naga nunger Missionary tesayur 7 aser par nisung (local) 5 lir. Tanabuba nung, Dunda nung missionary Asangba, Japu nunger aser pa kinungtsü tenati onok kanga junga anepalu. Kinungtsü Garhwalitsür lir. Tenati Pinewood School lapoka lir aser yangji student 150 aser tesayur 9 lir. Parnok rongnung tesayur anabo Naga nunger. Iba school nung class LKG nungi VIII tashi lir.

Parnok aliba tesemtem nung Tsüngrem O sadema mesayutetba agi school lapok aser kakat shisatsü den külemi Tsüngrem O nübortem dang sayur. Tanurtemi angazüktsü kanga janrar. VBS sentong mapang parnok dang ken, teka mapa (crafts) aser Yisu temeim indang sayua liasü.



Arogo-i team ana Uttarakhand-i yokba

Bhengi ya Tehri Garhwal kübok yim tila ka lir. Iba yimtak kibong 260 shi lir aser 3-4 shi tamanger kibong lir. Iba yimtak nisungtem temulung kanga temerang. Dunda ya Uttarkash kübok Sub-Division ka aser idaki kibong 100 shi lir. Idaki tamanger kibong mali.

Mission trip aortemi ajangshiba kar:

Amenla Pongen (M.Hill): Iba mission trip

mapang kü den Tsüngrem dena aliba tali tejangjaba meteta liasü. Ibai ajanga Tsüngrem dang nentaka sarasademtsü ni maongka angu aser shisabulu makai ayong-ayonga aliba jenjang nungi Tsüngremi ni anitet. Nisung ajak dang tebendang makai meimtsü aser tangar dang osang tajung ashitsü tali tejangraba kümdaktsü. “Na alidakji ne mission field lir. Idakji Tsüngremi na amshiner. Na meketa aliba samabapurtem angutsü asoshi tanela tenük lapokjang” ta Tsüngrem dang shiang.



Missionaries Merangba (Longkhum) aser Asangba (Japu) den tenyaba mapa inyak

Achila Imchen (Lerie): Uttarakhandi oa Pa mapa inyaktsü maongka angu nung Tsüngrem tenüng asanger. Yangji oa tanurtem dang sayutsü renem dang pongmang ama ni bilem. “Ni taremzüük makaba nisung ka lir. Anungji kü nem taremzüük angazükdaktsütsü nükjidong nung Tsüngremi ni tanurtem sayutsü yok” Yangji oa aliba mapang tepiyong Tsüngremi ni kanga yariogo. Iba team nung atentsüsa kü nem maongka agütsüba asoshi KABA, Mission Department, aser talisa Directorla dang pelaba metetdaktsür. Tsüngremi moajangma.

Lipokrenla Aochenlar (Chandmari): Lanuwa nungi jangra-a aliba mapa ka inyaktsü maongka angu nung kanga pela-a liasü. Anogo ishika Uttarakhand nung Tsüngrem mapa inyakdang sarasadem asang-sang nung langzüba meteta liasü. Onok aoba tesem nung aliba tamangertem taküm khuli angashia ni temoatsü tulu angu. Tenokdangba jenti liaka yangji aliba tamangertemi pei taküm bendanga agüja-a Tsüngrem mapa inyaker. Parnoki inyakba ngur külen mission mapa tuluba aser tarokba kü nem Tsüngremi angatetdaktsü. Aser kü sasa kü taküm meyipa reprangshi.

Nüngsang (Town Area): “Alurutsü jenti kar, saka nübu ishika dang” Mathi 9:37. Tanurtem atema VBS sentong atem dang iba o yagi kü den kanga jembi. VBS sentong ajanga ni temoatsü tulu angu. Tsüngremi sarasadem langzüba kanga jangja-a meteta aru. Missionary Asangba aser par kibong ajuru dang ni ajemalutsü angazük. Pa tamang nung kanga tashi tait. Pai kechisarena Tsüngrem nem nungloka yutsür aser Pa nungi telangzüba arema atar. “Tamangi tenem aenshidaktsütsü akok” Mathi 21:21 iba tebur tajung mission o kü nem Tsüngremi angatetdaktsü.

Aolemba (MRH): Kü taküm nung iba ya mezüngbuba saka ni asoshi ibai tatempangbuba mission trip masütsü ni sarasademer. Ni temoatsü anguba aika lir aser item rongnung samaba tanelatem aser mission field nung aliba missionarytem atema nentaka sarasademtsü ni angazük.

Temsüyangla (MRH): Kü taküm nung mezüngbuba aser teti jangra-a aliba mission trip aotsü asoshi ni kanga pela-a liasü. Ano tanurtem dang sayutsü asoshi aoba ajanga teyongyaba aser tejangraba tuluba aküm. Mission trip aoba ajanga yangji aliba tamangertem aser missionarytemi timtem ajuruba ni ngua liasü. Tsüngremi Pa sentongtem ataloktsü asoshi asenok amshir ta mission trip mapang angazüka liasü. Tamang nung koda aientsü ni angazükogo.

Purnüngsang (M.Hill): Iba mission trip ajanga kü taküm nung tamakok aser meinyaktetba ajak ni inyaktetogo. Iba mission trip ajanga ni sakdaksü aser kü tanela aser temang anaprongla nem tajangzük tulu agütsü. Tamanger maliba lima ka nung oa missionary inyaktsü temela masü. Asenoki memetetba timtem aika parnoki ajurur anungji asenoki missionarytem anepalutsüla aser akümtsübutsüla.

Missionary Asangba aser kinungtsü par den teyariteper ajak nem aser parnoki inyakba mapa ajak asoshi ni Yisu tenüng nung akümtsübu agütsür.

Abenla and Arensoba (Bayavü): Iba mission trip ajanga temoatsü aika ngua liasü. Saka aika rongnung temoatsü kar lemsatepnür. Mezüngbuba nung Tsüngremi sarasadem langzüba tali jangja-a metetba mapang tajung ka liasü. Tsüngremer wadang nung mapatila ka dang süaka, külemi kenbosa inyaktsü kinungtsü kuna kibong akümba anogo nungi sarasadema liasü aser aji Tsüngremi leman lapoktsü. Tanabuba nung, iba mission trip nung mamangertem den mapang tatsü ka alidang Tsüngremer wadang ano aika meinyaki lir ta angateta aru aser pei tanela jenjang reprangshiba mapang tajung ka liasü. Iba mission trip nung shilem agitsü maongka angu nung Tsüngrem tenüng asanger. Tsüngremi tazünger ajak moajangma.

Amenla (MRH): India nung osang tajung agi matongba nisungtem aser tesemtem aika lir ta iba mission trip ajanga ni meteta aru. Osang tajung mangashiba purtem dangi oa Tsüngrem O ashitsü aser sayutsü aser Yisui Osang Tajung sangtongtsü asenok nem nungloktsüba atalokdaktsütsü asenok khuret. Asen Teyanglur Tsüngrem indang samaba purtem dang ashitsü asenok ajak khuret lir. Missionary Odi Merang taküm ni asoshi tatishitsü tulutiba. Temulung temerang mamangertem rongnung tezü medangi maneni pai mapa meranga inyaker. Tsüngrem denbo ajak takoktsü ta ashiba ama kenübosa pai inyakba nung tejang jenti atangtsü.

Temjenmeren (AG): Kü taküm nung mezüngbuba mission trip aotsü asüba agi kanga yonga saka shisabulua liasü. Kecha tenokdangba aser tetsübuttsü makai Yisu dak amangtsü aser Pa mapa inyaktsüsa Khristan State ka nung Tsüngremi ni yutsü nung kanga pelar. Asenok yamai liaka nisung aikati ano Kümtetdakba Yisu Khrista indang mangashi aser memetet. Ni ozü fellowship lanurtem rongnung Asstt. Sponsor (Music) inyaker. Tsüngremer mapa nung ibai kanga tila ka dang. Ni Tsüngrem mapa inyaktsü ano aika lir ta meteta aru.

NSONG MISSION TRIP OSANG

—❖❖❖❖❖—
Amenla Longkumer
—❖❖❖❖❖—

Zeme Baptist Association (ZBA) ya Nagaland Baptist Church Council kubok tilatiba rongnung association ka lir. ABAM Church & Mission department-i ZBA mungdang yaria tenyaba mapa inyaka arudaki. Asen arogo Mission Department-i acha-ayanga Children's Bible Camp ka October 28 – 30, 2016 akatsü asoshi Sarasadem Committee convenor S. Rongsen aser Khampong driver dena onok 9 sarasadema apuso. Iba sentong ya ABAM Church aser Mission den külemi yaritepa agia liasü. Jalukie nungi Zeme nung missionary Mr. Tali dena onok ajak agi nisung 10 oa iba sentong nung takok tulu ngur aru.



Nsong jila ya Phek district nung lir aser Kohima nungi khonda 9 jajar atonger. Iba ya Zeme Baptist Association Mission centre lir aser idaki association-i lapokba Eden Mission School ka lir. Iba Children Bible Camp ya anogo 3 asoshi sarasadema tenzük. Anogo asem tashi camp nung atenertem class balala lemsar agia liasü. Iba camp nung tongtipangsa Laishiba aser ken sayu. Ano tanur shia den parnok tebilemba metettsü asoshi jembitsü merang. Iba camp nung tanurtem 178 dena temoatsü angu. Deobar devotional sentep onok nem bendanga agitsü maongka agütsü aser iba sentep nung S. Rongseni Tsüngrem O jembia liasü. Ano devotional sentep nung tanurtemi camp mapang angazükba ken kar aten.

Deobar nikongtsütsü Association nung tenzükertem aser Eden Mission School nung inyakertem den tajungshitep aser lemsatepba mapang liasü.

Arogopur sarasadem teyari ajanga timtem kecha majuru aser sentong ajak takok nguogo. Tsüngremi KABA, Pa wadang nung maneni amshiangma.



DUDU COLONY NUNG TSÜNGTONG TENYABA MAPA

—❖❖❖❖❖❖—
Aolemba Jamir
 —❖❖❖❖❖❖—



Dudu colony ya Dimapur jila nung lir. Idaki Muslim, Bihari, Nepali, Adivasi, Bengali, Assamese aser Naga nungera kar lir. Item rongnung Muslim nungertem teimba. Muslim nungertemi amokbanger aliba colony ka asünung Khristan akümba pur karbo colony nungi jentokba otsü lir. Telok nungi jentoktsü tsübuba ajanga iba colony nung alirtem aikati Khrista magizüki lir. Iba colony nung October 20-22, 2016 tashi asen arogo nung Mission Department-i acha-ayanga tanurtem atema Vacation Bible School sentong ka agia liasü.

Iba sentong nung tanurtem 93 tashi dena liasü. Tasoba küm aser School nung class apir tanurtem telok 3 küma lemsa. Iba sentong nung talisa Laishiba otsü, ken aser temulung o aser noksa yangluba tanurtem dang sayua liasü. Tanurtemi Laishiba otsü aser lai tekongtem temulung agi azüngtsü angazükba den ken aser teka mapa aika angazüka liasü. Anogo shia VBS class tembanga tanurtem senshir külen Elia Hereh aser tebuttsü den telongjem aser sarasadem mapang agia liasü. Iba telongjem (fellowship) ajanga Mr. Elia Hereh aser par kibongi ministry inyak dang timtem ajuruba aser temulung raksatsüsa taküm khuli aika lemsatepa liasü. Anogo shia par kibong den telongjem agiba ajanga par kibongi ministry mapa nung timtem aika ajurudaki ta angateta liasü.

Anogo 3 tashi tanurtem rongnung Tsüngrem mapa inyakba amajok masütsü. Tanurtem dang kechi Tsüngrem O sayuogo item kenü anogo ali tajung nung tsükba metsü ama meia tejang jenti atangtsü asoshi asenoki teti sarasademdi. Tanabuba nung arogopur ajaki Elia Hereh aser par kibong atema maneni sarasademdi.

Tarutsü nunga asen arogo Mission Departmenti sarasadema renemba mission sentong ajak nung lanurtemi mulungsoa shilem agitsü onok team züngsem ajaki lanurtem ajungshir.

Team züngsemtem nungi tajangshiba/temoatsü anguba

1. **Yapangtula Mozur (MRH):**

Kü class nung tanurtem 26 liasü. Parnok dang Laishiba otsü den Tsüngrem o ashi. Meimchir temenen mechi Yisu kangki nung asüba indang kanga nentaka sayu. Tanurtem nem lai tekongtem angazükdaktsü. Ni asoshi ibai temoatsü mapang ka liasü. Ano tarutsü nung ibala sentong nung shilem agitsü sarasadema aser yongyaseta atar

2. **Obanglangba Pongen (Town Area):**


Tanurtem aser külem team züngsemtem nungi tajung aika ni angazük. Lanurtem talisa shirnok graduate sür lir parnok nisung tain kati anir ibala mission mapa inyaktsü yokra kanga ajungtsü ta nibo bilemer.

3. **Aolemba Jamir (MRH):**

Dudu colony nung anogo 3 tashi tanurtem rongnung Tsüngrem mapa inyakba ya maongka tulu ta ni bilemer. Talisa Elia Hereh aser par kibongi Dudu colony nung alirtem meimba aser taküm bendanga agüja tenzükba angu dang ni kanga ajungshi. Nagaland nung aliba tzümartem dang ni Khrista temeim ashitsü tali jangradaktsü. Asenok dang meimba ama Yisui tzümartem meimer aser Pa parnok asoshi kangki nung asü.

MYANMAR NAGA TENYABA

Rev. I. Bendangmeren



Donghi nung hostel tasen yanglutsu ali

Kohima Ao Baptist Arogoi küm aika Naga Myanmar nung kechi komala Mission ka inyaksü ta bilemdanga sarasadema arur külen Human development Mission ka inyak nung ajungtsü ta Tsüngremer tetuyuba ka nung tangatetba aru. Küm asem pezü shi tesem balalai oa reprangdanga aser ladanga aru. Yamaji Tsüngremer leniba ka nung Hangya Baptist Mission (association) nunger den iba tenyaba mapa inyaksü lemtet. Tesem telongtetji repranger yimtsüng ter shimtet aser item yimtsüngtem nungi parnok sasa

bushiteter tanur tila kaka school züngdaksütsü yoktsü asüngdang. Parnoki kanga dang mulungbena shimteter yoka parnokji Donghi jila (town) nung Hostel ka lapoka 2016 küm nungi school züngdaksüdagi. Asen Arogo-I Kaisen mungdang 3 lenir ita sen agüja yaridaki.

Kü den Temjenmongba Sempo aser Myanmar Naga nunger Mr. Mannie onok anitsü Kohima nungi November 23, 2016, Kohima nungi Donghi, Myanmar, aotsü apuso. Myanmar Naga area tesem nung anasatapa Jilaji (Town) Donghi ya lir. Tang tashi nung Jila ana nung dang High school lapoka lir. Donghi town ya anasatiba süakasa tang tashi nung road transportation junga makaba agi Arunachal lima tatempangtiba yim Nuklu nungi tetsüng agi künü songtema jajar Hashik Nokno anatiba Myanmar Naga yimji atonger. Iba yim nungi ananü lenmang bikes nung longren longpang ajak ajangdanga tetsüng lenmang aser Sü senzüba lenrü nung jajar ang Donghi jilaji atonger. Tang KABAi iba jila nung



Pastor ana lungren ajanga bikes nung senzu

ali tesem ka alizüka yangji Hostel yanglua tanurtem parnok 7 lidakja school züngdaksür, 2017 nungi tanurtem 10 züngdaksütsü ternembalir.

Myanmar Naga nüburtem ya meranga inyakba aser ochishir kin lir. Saka pei-i züsentetba kisüing agir chia jema aliba nüburtem. Metsü alitsü anogo ananü asemnü lenmangजार külenang alitetba. School azüngtsü asoshi yimtsüing ajak nungbo school mali. Anungji züngnüseta mezüngteti aliba



Warden Umto & tebutsu

nüburtem asünung kanga temulung shiranga repranger. Parnokji tagütsünü pei akaba kechi lir ajakji lemsatepba achiba aser takitarutsü ajak lemsatepba agiba nüburtem lir. Parnoki tongnüba tongtetsüsa lenmang kecha mali, züngnüaka school mali, light tesangwa kecha maka, senzusenpongtsü lenmang kecha maka. Iba tia nung kanga dang meranga alir.

Myanmar Naga nunger rongnung kin oshi balala aika lir. Oshi ajanga longjemer aliba lokti pezü lir. Itemji Tangsang, Namyung, Ullo aser Hangya. Myanmar Naga telok rongnung Hangya ya tulutiba aser netsüing timtiba lir. Saka ano kanga tesülen aliba nübur, Tsüngremer sentong ka südi ta bilembaji KABA Human development tenyaba lemteter bushitepba aodang Hangya nunger den iba mapa ya tenzüktsü lenmang bener arutsü. Küm 25-30 tsüingda nung item tanürtem 10ji graduate aser Post graduate tashi züngteter pei nüburtem anitettsü maparen inyaktsü ta KABA nükjidong tulu yur amangbapur ajaki sarasadema inyaktsü tenzükogo. Asen Kibuba Yisu marui lira parnok ajanga pei lima dangi tesangwa tulu bener arutsü mangdang lir.

Myanmar Naga Baptist tereprangtsü iba amai ken ranglok nung angur.

Naga Baptist Convention Myanmar (iba küpok Association 4 lir)

- 1) Tangsang Baptist Association
- 2) Namyung Baptist Association
- 3) Ullo Baptist Association
- 4) Hangya Baptist Association

Kodang James Calvert Fiji Asetkong nung nisung shi achirtem rongnung missionary inyaksü apuso, rong anisangi pa meyipa odaksütsü merang aser Calvert dang ashi "Item nübortem dangi ora na dang masü ne den aortem ajak taküm samatsü" Idangji Calverti yamai langzü "Yagi maru dang onoksüogo"

ASIA SOUL WINNERS 2016 OSANG

—❖❖❖❖❖—
Lanuyanger Ozüküm
—❖❖❖❖❖—



Asia Soul Winners nungi Kohima Ao Baptist Arogo dangi salem abener!

KABA sarasadem, temeim aser teyari asoshi Tsüngrem tenüng asanger. March ita nungi tenzüka KABA-i yaria nungitba ajanga kü tashi aser temetetbadak tali ASW ministry inyaka arudagi. Ni Tsüngrem tenüng asanger aser KABA dang pelar. Tsüngremi KABA moajangma.

Ita tenet tsüngda ASW ministry nung inyakba kar yamai lemsatepner:

ASSAM NUNG SILONIJAN WADANG INDANG –

Silonijan wadangnya Highway nungi kilometre 4-5 shi pilar aser Nepali nunger alidak amenoka lir, aser Western Rengma, Karbi, Adivasi nunger-a eshika lir. Saka Khristanbo mali. Item nüburtem tanela, shisatsü aser temang nüngdakba ngua ASW-i mapa asem tenzüka lir – Arogo, School aser tanurtem asoshi Compassion Ministry.

i) AROGO

Arogo tenüngya *Purana Silonijan Baptist Church* ta ajar; Pastor Sohilo-i iba arogo ya 2006 nung tenzük aser tanübo arogopur 32 tashi lir (membership malirtem tenabo 50 shi lir). Parnokji timbaka anogoshi ayanga chiyungertem lir.

Easter Sunday nü küm 13 (tersem) tetsürchanu ka tsü nung baptia liasü. Tsüngremer arogo-i tanela tasen ka aniokba asoshi arogo nung tepela tulu liasü. La tanela nung maneni aienstü asoshi sarasademjangma. Sannüker (pastor) nem shisatsü, tashi aser anema aliba taküm moajang ta sarasadem nung maneni yaridaktsüner.

ii) SCHOOL MINISTRY

Mr. Hanimo Semy-er jabaso Master Hiti Semy, shiba ita 9 (teko) asüandang alima nungi pila ao, iba jabaso tenüng nung 2015 küm school ka lapok. Mr. Hanimo Semy-i ASW nem school lapoktsü asoshi ali peria agütsü aser iba



school ya par jabaso tenüing nung lapok. Anungji school tenüingya Hiti Semy Memorial School ta ajar; school ya küm shia upgrade asütsü bilema lir. Taküm küm ya class 5 tashi nungtebur 48 aser tetsür 42 tashi lir; aser tesayur 7 tashi inyaker.

Studenttem aser tesayurtem teyimka Hindu nunger asü nung Khristan tesayur temi Chapel (school nung anepdang sarasadem mapang) nung laishiba zünga khristan ken sayur aser staff meeting-o classroom nunga yimya tajung sayur.

March ita 19, 2016 nung Seminar ka jazüka among. "Child Behaviour and Teaching Skill" onük nung ajemdaker Mr. Kenny Semp, Lecturer, DIET Chiechama, arua lemsatepa liasü. Iba seminar nung nisung 25 tashi arua aten.

Tesayurtem asoshi maneni sarasadenjangma.

iii) COMPASSION MINISTRY

Iba wadang ya Compassion East India den külemi teka amteper 2014 nung Hindu tanur rongnung inyaksü tenzükbä lir. Tanur ajak agi 200, staff 12 aser sorochiokba nung teyarir ka lir. Hombar nungi Hokolbar tashi 3:00pm nungi 4:30pm tashi class agir. Lesson azüngba dang masü saka activities balala inyakba ajanga tanurtem tajangzük ngua arudaki. Ano mapang shia tanurtem chiongtsü –a anepalutsür. Item mapa tajung inyakba ngu-a tsürabur aikati pei tanurtem iba wadang-i yokdaki. Aser parnok-i Compassion Ministry den tesendaktep tajung ayur. Compassion Ministry tanurtem asoshi **Medical Scanning** sendong ka liasü. Doctor 3 tashi arua tanurtem 150 temang reprang.

SEMINARTEM AGIBA OSANG

1. *CHILD PROTECTION SEMINAR:* tanurtem taküm jenjang tajungba kümdaktsütsü nükjidong yur April 9, 2016 nü seminar jazük aser Mrs. Imkümla, Psychological Counselling Center, Dimapur, nungi arua o jembi. Ajak agi nisung 34 tashi arua temoatsü ngua liasü.
2. *WESTERN RENGMA WOMEN SEMINAR:* Rengma Hills, Assam, nung Health Management Seminar ka liasü. Iba nung tongdi O jembi ASW Directorba kinungtsü liasü. Ajak agi tetsür 105 aten. Nia iba mapang nung arogo ka nung O jembi liasü. Iba tesem semdangba mapang nung nüpurtem asoshi tanüla aser temang nüngdakba aika lir ta ajiteta liogo.

NEPAL WADANG OSANG

ASW ajanga Nepal wadang-a repranger aser Nepali missionary eshika yua lir. Parnoki Hindu nunger yimtem semdanga Yisu indang ashir. Item rongnung missionary ka tenüing agi Keshap lir aser pai radio ministry inyakba ajanga nüburtem aika Yisu osang agi atonger. Pa alidaki nia hopta ana atema ao aser youth fellowship nung O jembi aser yimtsüng kar semdanga liasü. Iba mapang nung Hindu nunger kibong ka nung anen aser par kima kecha tenokdangba makai Hindu nungertem dang Yisu film sayu.



Kathmandu nung pastor Phurpu semdanga Nepal nung parnok wadang indang aika angazüka liasü. Par telok yagi Nepali nung den dang masü saka Tibetan nung dena inyaker. Item ajanga Nepal nung ano teinyaksü jenti lir ta ajiteta liasü.

ARUNACHAL WADANG OSANG

Asia Soul Winners küpok Arunachal Himalayan Church nung arogo pezü lir - Itanagar, Seppa, Bomdila aser Tawang. Item arogo Pastor Dolo Sonu-i repranger aser pai anir meketa aliba yimtsüng aser Arunachal-o China na artsü nung aliba yimtsüngtem-a repranger.

Nia hopta ana atema Arunachal nung arogotem semdanga aser sayutsüngia liasü. Iba mapang Bomdila nung Buddhist nung Khristan kümer aliba kibong kati school lapokba semdanga liasü. Tawang town nunga Nepali aser Mongpha arogo nung dena Tsüngrem O bena liasü. Tawang nungji Khristantem rongnung telongjem maliba agi mamangertem rongnung evangelism mapa meinyakteter. Idakji Khristantemi sademsadema mekülemteter, parnok atema sarasademjangma.



CHHATTISGARH NUNG SHORT TERM MISSION MAPA INYAKBA OSANG

Imtichila Jamir



April 29, 2015 nü Chattisgarh nung R.B. Shining Star Public School nung missionary tesayur mapa inyaksü asoshi Kohima nungi apuso. Mission mapa inyaksü tejangraba liaka mopung tatsük, electricity timba mangur aser yim tezülen ka nung alitsü aor asü nung khenbo arentaka bilem saka ajakji Tsüngrem nem bendanga agütsür sarasadema apuso. Idakji mapa tenzük dang table aser chairtem aser class room ajak nung rong tepa aser class roomtem shitoka tenzük. Item mapa ajakji onok pezüi ita asem nungang renemtet.

Iba sülen class room jarak ajak nung ki naro aser noksatem enoka class taktang tebur junga ajak agi table aser chair ajak agi 40 yanglu aser kibong shiai oagi school lapokba osang agüja senzü. Item ajak inyaksü kanga tasak liasü saka Tsüngremi tashi agüja anepdang 10:00 am nungi aonung 9:00 pm tashi inyaktet.

Kenü May ita amongnü ka, kibong tekülem temer kelen onok chiyongtsü makaba agi yaseta tatsük-talemji maremteti mejanga kazüya alidang tanga mapang nungbo marudangba tamanger ka onok semdangi aru aser nenok atema oagi sarasademjang ta kari



pa dang ashiba ajanga onok bushia aru.. Iba süllen pai onok külem tenzük ka anir oagi nüngdaka jang aser aonsotsü balala den anshia tena alitsü. Onok kanga pelatepa liasü aser Apijemtsü Shin 10:3 nung “Kibubai temeshipur yaa metoktsür” ta shia alibaji bilemteta Tsüngrem tenüng sanga liasü. Iba jagi onok tamang nung tali tashi itshidaktsü.

Mapa ajak tembanger onok tesayur 5 aser tanur 40 dak tali arua school tenzük. Saka school tenzükli nungi Orissa nungi aruba

tetsür tesayur shiba küm 7 tesayur mapa inyakba nisung ka liasü lai niang school nung tekolak südaktsüba ajanga temulung machi aküm aser küna tesendaktep mejungi aküm. Saka külem tenzüker Sharwanbhaiya-i kechi koda iba school asoshi ni tenla agüja mapa tulu inyak aji rateta ashidang lai angatet aser küna teyi-o-tenuna ama kanga medemer tajung aküm.

Iba sülenji itasen magütsütetba agi tetsür tesayur ana oadoktsüsa aküm anungji school nung tetsür ni dang aküm aser nursery tesayur mali nung ibajia nisa abentsüsa aküm. Ni M.A Literature degree akaba nisung ka aser tila tanur sayutsü temetetba makaba nisung kati tila tanur paikaji koma anepalutsü ta shisabuluba den tila tanur sayutsüjibo ni asoshi jenjang tekübokbai alur ama ni bilem. Saka ni iba mapaji agizük aser aonung ni Tsüngrem dang kü khuret shia lai zünga sarasademdang Filipi 2 tekong 5-8 tashi nung Khrista ama tila akümstsü indang shia alibaji züngshi. Idangji nai kechi inyaker aji Tsüngrem sentsüwangshi asoshi lir aser ne Degreeji tongtipang masü ta Tsüngremi kü den jembi. Iba jagi ni kanga temoatsü angu aser taasüng nungjagi ni nursery classji pelashishia sayu. Ni aji tamakoktsü ama bilem saka Tsüngremi ni yaria iba mapa takok ngua inyak. Tila tanurtemji ni aliba agi kanga pelatep aser külem tenzükertemi niji parnok tetsü (mother) ta jaa liasü. Studenttem asoshi teinyaktsü aika liasü anungji ni onok school nung azüngertem süshia mesüra tanga school nung azünger süshia hopta nung anogo 3 tuition agüja tenzük.

YWAM pur den longjemer yimtem semdanga kiboksemi oa onok kanga jangratema tenzükba mapa inyaka liasü. School nungji honibar shia ken sayua aser otsü shia skit aiba aser action songtem sayua onok kanga pelatepa tenzük.

Hindu nungertemi Khristanem rishikangshiba aser amok merena merenshiba temeket yimtem nungi angashia liasü. Onok school nung azünger tanur ka kibong tamanger asübayong yimdak nungi aridoktsü ta amok meren saka Tsüngrem taochi agi parnok maridok. Saka onok alidakjibo kecha tamajung atalokba maliasü. Aonung shia onoki Tekülem aser tetushi agi, gitar tema tashi agi ken tentepa kazü saka shingaia onok nem timtem magütsü kechiyong onok Kibubai kümzüka ayu. Students tsürabur den telongjem meeting akadang onok mission, aser wadang aser khuretem lemsatepa liasü aser tesüngmangtsü kaji onok mapaji pelashishia agizük. Mapang ka nung onok chiyongtsü timtem indang lemsatep nung mamanger kati jang 50 kg bener arua tenla agütsü. Atangji Tsüngrem temeimji tesüngmangtsü ka lir.

Tesüiba küm ka meyipa reprangdang iba küm takok ngua tembangtetbaji Tsüngrem kü den aliba agi ta pelar. Tanga tanurtemi video message nung Achi didi (oya), onoki na menungrar iba school nung azüngtsü maongka agütsüba asoshi onok temulungjang taroktiba nungi kanga pelar ta ashidang ni kanga temoatsü angur. Ni iba mission field-i aobaji sayutsü asoshi masü saka tanurtem nungi ni angazüktzü ao ta bilemer aser ya ni kodanga mamatsü. Ajemalutsü, taremsük akatsü aser Tsüngrem dak tamang akatsü item tanurtem nungi ni angazük.